

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता

पद पाठः (वाक्य सहित)

तृतीयकाण्डे चतुर्थः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in

Version Notes:

This is now the current Version 2.0 dated June 30, 2024.

1. This replaces the earlier version 1.1 dated Sep 30, 2022.
2. This version has been updated with the errors found and reported till June 15, 2024.
3. Required convention, style and presentation improvements or standardisations has been done wherever applicable.
4. In this Compilation the Samita Vaakyams have been suitably aligned, synchronised and refurbished in line with “Pada Paatam”.

Earlier Versions

1st	Version Number	0.0 dated 31st Jan 2019
2nd	Version Number	0.0 dated 31st July 2019
3rd	Version Number	1.0 dated 30th Nov 2020
4th	Version Number	1.1 dated 30th Sep 2022

Table of Contents

3 कृष्ण यजुर्वेदीय तैत्तिरीय संहितायं पद पाठे तृतीयं काण्डं	4
3.4 तृतीयकाण्डे चतुर्थः प्रश्नः – इष्टिहोमाभिधानं	4

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3 कृष्ण यजुर्वेदीय तैत्तिरीय संहितायं पद पाठे

तृतीयं काण्डं

3.4 तृतीयकाण्डे चतुर्थः प्रश्नः – इष्टिहोमाभिधानं

TS 3.4.1.1

वि वा ए॒तस्य॑ य॒ज्ञ ऋ॑द्ध्यते॒ यस्य॑ ह॒विर॑तिरिच्यते॒ सूर्यो॑ दे॒वो
दि॒विष॑द्भ्य॒ इत्या॑ह बृ॒हस्प॑तिना चै॒वास्य॑ प्र॒जाप॑तिना च य॒ज्ञस्य॑
व्यृ॒द्धम॑पि वपति॒ रक्षा॑ँसि वा ए॒तत् प॑शुँ स॒चन्ते॑ यदे॒कदे॒वत्य॑
आल॑ब्धो भू॒यान् भ॑वति॒ यस्या॑स्ते ह॒रितो॑ गर्भ॒ इत्या॑ह दे॒वत्रै॑वैनां॑
गम॑यति॒ रक्ष॑सामप॒हत्या॑ आ वर्त॑न वर्त॒येत्या॑ह – [] 1

TS 3.4.1.1 - Padam

वी॒ति । वै । ए॒तस्य॑ । य॒ज्ञः । ऋ॑द्ध्यते । यस्य॑ । ह॒विः ।
अ॒तिरि॑च्यत॒ इत्य॑ति – रिच्यते । सूर्यः॑ । दे॒वः ।
दि॒विष॑द्भ्य॒ इति॑ दि॒विष॑त् – भ्यः॑ । इति॑ । आ॒ह । बृ॒हस्प॑तिना ।

च॒ । ए॒व । अ॒स्य॒ । प्र॒जा॒प॒ति॒ने॒ति॒ प्र॒जा – प॒ति॒ना । च॒ । य॒ज्ञ॒स्य॒ ।
व्यृ॒द्ध॒मि॒ति॒ वि – ऋ॒द्ध॒म् । अ॒पी॒ति॒ । व॒प॒ति॒ । र॒क्षा॒ँ॒सि॒ । वै । ए॒तत् ।
प॒शु॒म् । स॒च॒न्ते॒ । यत् । ए॒क॒दे॒व॒त्य॒ इ॒त्ये॒क – दे॒व॒त्यः॒ । आ॒ल॒ब्ध॒
इ॒त्या – ल॒ब्धः॒ । भू॒यान् । भ॒व॒ति॒ । य॒स्याः॒ । ते । ह॒रि॒तः॒ । गर्भः॒ ।
इ॒ति॒ । आ॒ह॒ । दे॒व॒त्रे॒ति॒ दे॒व – त्रा॒ । ए॒व । ए॒ना॒म् । ग॒म॒य॒ति॒ ।
र॒क्ष॒साम् । अ॒प॒ह॒त्या॒ इ॒त्यप॒ – ह॒त्यै॒ । ए॒ति॒ । व॒र्त॒न॒ । व॒र्त॒य॒ । इ॒ति॒ ।

आ॒ह॒ । १ (५०)

TS 3.4.1.2

ब्र॒ह्म॒णै॒वैन॒मा॒ व॒र्त॒य॒ति॒ वि॒ ते॒ भि॒न॒द्भि॒ त॒क॒री॒मि॒त्या॒ह॒
य॒था॒य॒जु॒रे॒वै॒तदु॒रु॒द्र॒प्सो॒ वि॒श्व॒रू॒प॒ इ॒न्दु॒रि॒त्या॒ह॒ प्र॒जा॒ वै॒ प॒श॒व॒ इ॒न्दुः॒
प्र॒ज॒यै॒वैनं॑ प॒शु॒भिः॒ स॒म॒र्द्ध॒य॒ति॒ दि॒वं॒ वै॒ य॒ज्ञ॒स्य॒ व्यृ॒द्धं॒ ग॒च्छ॒ति॒
पृ॒थि॒वी॒म॒ति॒रि॒क्तं॒ तद्–य॒न्न॒ श॒म॒ये॒दा॒र्ति॒मा॒र्च्छे॒द्–य॒ज॒मा॒नो॒ म॒ही॒ द्यौः॒
पृ॒थि॒वी॒च॒ न॒ इ॒त्या – [] २

TS 3.4.1.2 - Padam

ब्र॒ह्म॒णा । ए॒व । ए॒न॒म् । ए॒ति । व॒र्त॒य॒ति । वी॒ति । ते । भि॒न॒द्भि ।
त॒क॒री॒म् । इ॒ति । आ॒ह । य॒था॒य॒जु॒रि॒ति य॒था – य॒जुः । ए॒व । ए॒त॒त् ।
उ॒रु॒द्र॒प्स इ॒त्यु॒रु – द्र॒प्सः । वि॒श्व॒रू॒प इ॒ति वि॒श्व – रू॒पः । इ॒न्दुः ।
इ॒ति । आ॒ह । प्र॒जे॒ति प्र – जा । वै । प॒श॒वः । इ॒न्दुः । प्र॒ज॒ये॒ति
प्र – ज॒या । ए॒व । ए॒न॒म् । प॒शु॒भि॒रि॒ति प॒शु – भिः । स॒मि॒ति ।
अ॒र्द्ध॒य॒ति । दि॒व॒म् । वै । य॒ज्ञ॒स्य । व्यृ॒द्ध॒मि॒ति वि॒-ऋ॒द्ध॒म् ।
ग॒च्छ॒ति । पृ॒थि॒वी॒म् । अ॒ति॒रि॒क्त॒मि॒त्य॒ति – रि॒क्त॒म् । त॒त् । य॒त् । न ।
श॒म॒ये॒त् । आ॒र्ति॒म् । ए॒ति । ऋ॒च्छे॒त् । य॒ज॒मा॒नः । म॒ही । द्यौः ।
पृ॒थि॒वी । च । नः । इ॒ति । 2 (50)

TS 3.4.1.3

ह द्या॒वापृ॒थि॒वी॒भ्या॒मे॒व य॒ज्ञ॒स्य व्यृ॒द्धं चा॒ति॒रि॒क्तं च श॒म॒य॒ति
नाऽऽ*र्ति॒मा॒च्छ॒ति य॒ज॒मा॒नो भ॒स्म॒ना ऽभि॒ स॒मू॒ह॒ति स्व॒गा॒कृ॒त्या अ॒थो
अ॒न॒यो॒र्वा ए॒ष ग॒र्भो॒ऽन॒यो॒रे॒वैनं॑ द॒धा॒ति य॒द॒व॒द्ये॒द॒ति तद् रे॒च॒ये॒द्
य॒न्ना॒व॒द्ये॒त् प॒शो॒राल॒ब्ध॒स्य ना॒व॒द्ये॒त् पु॒र॒स्ता॒न्ना॒भ्या
अ॒न्य॒द॒व॒द्ये॒-दु॒परि॒ष्टा॒दन्य॒त् पु॒र॒स्ता॒द् वै ना॒भ्यै – [] 3

TS 3.4.1.3 - Padam

आ॒ह । द्या॒वा॒पृ॒थि॒वी॒भ्या॒मि॒ति॒ द्या॒वा॒ – पृ॒थि॒वी॒भ्या॒म् । ए॒व । य॒ज्ञ॒स्य॑ ।
व्यृ॒द्ध॒मि॒ति॒ वि॒ – ऋ॒द्ध॒म् । च॒ । अ॒ति॒रि॒क्त॒मि॒त्य॒ति॒ – रि॒क्त॒म् । च॒ ।
श॒म॒य॒ति॒ । न॒ । आ॒र्ति॒म् । ए॒ति॒ । ऋ॒च्छ॒ति॒ । य॒ज॒मा॒नः॑ । भ॒स्म॒ना ।
अ॒भि । स॒मि॒ति॒ । ऊ॒ह॒ति॒ । स्व॒गा॒कृ॒त्या॒ इ॒ति॒ स्व॒गा॒ – कृ॒त्यै॒ ।
अ॒थो इ॒ति॒ । अ॒न॒योः॑ । वै । ए॒षः । ग॒र्भः॑ । अ॒न॒योः॑ । ए॒व । ए॒न॒म् ।
द॒धा॒ति॒ । य॒त् । अ॒व॒द्ये॒दित्य॑व – द्ये॒त् । अ॒ती॒ति॒ । त॒त् । रे॒च॒ये॒त् । य॒त् ।
न॒ । अ॒व॒द्ये॒दित्य॑व – द्ये॒त् । प॒शोः॑ । आ॒ल॒ब्ध॒स्ये॒त्या॒ – ल॒ब्ध॒स्य॑ । न॒ ।
अ॒वे॒ति॒ । द्ये॒त् । पु॒र॒स्ता॒त् । ना॒भ्याः॑ । अ॒न्य॒त् । अ॒व॒द्ये॒दित्य॑व – द्ये॒त् ।
उ॒परि॒ष्ठा॒त् । अ॒न्य॒त् । पु॒र॒स्ता॒त् । वै । ना॒भ्यै॑ । 3 (50)

TS 3.4.1.4

प्रा॒ण उ॒परि॒ष्ठा॒दपा॒नो या॒वा॒ने॒व प॒शु॒स्त॒स्या॒व द्य॒ति वि॒ष्णा॒वे शि॒पि॒वि॒ष्टाय॑
जु॒हो॒ति॒ यद् – वै य॒ज्ञ॒स्या॒ति॒रि॒च्य॒ते यः प॒शो॒र्भू॒मा या पु॒ष्टि॒स्तद् – वि॒ष्णुः॑
शि॒पि॒वि॒ष्टो ऽति॒रि॒क्त ए॒वा॒ति॒रि॒क्तं द॒धा॒त्य॒ति॒रि॒क्त॒स्य॑ शान्त्या
अ॒ष्टा॒प्रू॒ङ्ढि॒रण्यं॑ दक्षि॒णा॒ऽष्टा॒प॒दी ह्येषा॑ ऽऽत्मा न॒व॒मः प॒शो॒रा॒प्त्या॑

अन्तरको॒श उ॒ष्णी॒षेणाऽऽवि॑ष्टितं भवत्ये॒वमि॒व हि प॒शुरु॒ल्बमि॒व ()
चर्म॑व मा॒ं॒समि॒वास्थी॑व यावा॒नेव प॒शु-स्त-मा॒प्त्वाऽव रु॒न्धेय॑स्यैषा
यज्ञे प्रायश्चित्तिः क्रियत इष्ट्वा वसीयान् भवति ॥ 4

TS 3.4.1.4 - Padam

प्रा॒ण इति॑ प्र - अ॒नः । उ॒परि॑ष्ठात् । अ॒पान॑ इत्य॒प-अ॒नः । यावा॑न् ।
ए॒व । प॒शुः । तस्य॑ । अ॒वेति॑ । द्यति॑ । वि॒ष्णवे॑ । शि॒पिवि॑ष्टायेति॑
शि॒पि - वि॒ष्टाय॑ । जु॒होति॑ । यत् । वै । य॒ज्ञस्य॑ । अ॒तिरि॑च्यत
इत्य॑ति - रि॒च्यते॑ । यः । प॒शोः । भू॒मा । या । पु॒ष्टिः । तत् । वि॒ष्णुः ।
शि॒पिवि॑ष्ट इति॑ शि॒पि - वि॒ष्टः । अ॒तिरि॑क्त इत्य॑ति - रि॒क्ते॑ । ए॒व ।
अ॒तिरि॑क्तमि॒त्यति॑ - रि॒क्तम् । द॒धाति॑ । अ॒तिरि॑क्तस्येत्य॑ति - रि॒क्तस्य॑ ।
शा॒न्त्यै॑ । अ॒ष्टाप्रू॑डित्य॒ष्टा - प्रू॒ट् । हि॒रण्य॑म् । दक्षि॑णा ।
अ॒ष्टाप॑दीत्य॒ष्टा - प॒दी । हि । ए॒षा । आ॒त्मा । न॒वमः॑ । प॒शोः ।
आ॒प्त्यै॑ । अ॒न्तर॑को॒श इत्य॑न्तर - को॒शे । उ॒ष्णी॒षेण॑ ।
आ॒वि॑ष्टितमि॒त्या - वि॒ष्टित॑म् । भव॑ति । ए॒वम् । इ॒व । हि । प॒शुः ।
उ॒ल्ब॑म् । इ॒व () । चर्म॑ । इ॒व । मा॒ं॒सम् । इ॒व । अ॒स्थि॑ । इ॒व ।

या॒वान् । ए॒व । प॒शुः । तम् । आ॒प्त्वा । अ॒वेति॑ । रु॒न्धे । य॒स्य ।
ए॒षा । य॒ज्ञे । प्रा॒यश्चि॑त्तिः । क्रि॒यते॑ । इ॒ष्ट्वा । व॒सीया॑न् ।

भ॒वति॑ ॥ 4 (71)

(व॒र्तये॑त्याह॒-न इति॑-वै ना॒भ्या-उ॒ल्ब॑मि॒वै-क॑वि॒शति॑श्च) (A1)

TS 3.4.2.1

आ वा॒यो भू॒ष शु॒चि॒पा उप॑ नः स॒हस्रं॑ ते नि॒युतो॑ वि॒श्ववा॑र ।
उपो॑ ते अ॒न्धो म॒द्य-म॑यामि॒ यस्य॑ दे॒व द॑धिषे॒ पूर्व॑पेयं ॥
आकू॑त्यै त्वा का॒माय॑ त्वा स॒मृधे॑ त्वा कि॒क्कि॒टा ते मनः॑ प्र॒जाप॑तये
स्वाहा॑ कि॒क्कि॒टा ते प्रा॒णं वा॒यवे॑ स्वाहा॑ कि॒क्कि॒टा ते चक्षुः॑ सू॒र्याय॑
स्वाहा॑ कि॒क्कि॒टा ते श्रो॒त्रं द्या॑वापृ॒थि॒वीभ्या॑ स्वाहा॑ कि॒क्कि॒टा ते
वाच॑ सर्॒स्वत्यै॑ स्वाहा- [] 5

TS 3.4.2.1 - Padam

एति॑ । वा॒यो इति॑ । भू॒ष । शु॒चि॒पा इति॑ शु॒चि - पाः । उपेति॑ । नः ।
स॒हस्र॑म् । ते । नि॒युत॑ इति॑ नि - युतः । वि॒श्ववा॑रेति॑ वि॒श्व - वा॒र ॥
उपो॑ इति॑ । ते । अ॒न्धः । म॒द्यम् । अ॒यामि॑ । यस्य॑ । दे॒व । द॑धिषे ।

पूर्व॑पेय॒मिति॑ पूर्व॑ – पेय॑म् ॥ आ॒कू॒त्या॒ इत्या॑-कू॒त्यै॑ । त्वा॑ । कामा॑य ।
 त्वा॑ । समृ॒ध इति॑ सं – ऋ॒धै॑ । त्वा॑ । कि॒क्कि॒टा । ते॑ । मनः॑ ।
 प्र॒जाप॑तय इति॑ प्र॒जा – प॒तये॑ । स्वाहा॑ । कि॒क्कि॒टा । ते॑ । प्रा॒णमि॑ति
 प्र – अ॒नम् । वा॒यवे॑ । स्वाहा॑ । कि॒क्कि॒टा । ते॑ । चक्षुः॑ । सूर्या॑य ।
 स्वाहा॑ । कि॒क्कि॒टा । ते॑ । श्रो॒त्रम् । द्या॒वापृ॑थि॒वीभ्या॑मिति॑
 द्या॒वा-पृ॑थि॒वीभ्या॑म् । स्वाहा॑ । कि॒क्कि॒टा । ते॑ । वा॒चम् । सर॑स्वत्यै ।
 स्वाहा॑ । 5 (50)

TS 3.4.2.2

त्वं तुरी॑या व॒शिनी॑ व॒शाऽसि॑ स॒कृद् यत् त्वा॑ मन॑सा गर्भ॑ आ ऽश॑यत् ।
 व॒शा त्वं व॑शिनी॑ गच्छ॑ दे॒वान्थ्-स॒त्याः स॒न्तु यज॑मानस्य॒ कामाः॑ ॥
 अ॒जा ऽसि॑ रयि॒ष्ठा पृ॑थि॒व्याꣳ सी॒दोर्द्ध्वाऽन्तरि॑क्षमु॒प तिष्ठ॑स्व दि॒वि ते॑
 बृ॒हद् भाः॑ ॥
 तन्तुं॑ त॒न्वन् रज॑सो भा॒नुम॑न्विहि॒ ज्योति॑ष्मतः प॒थो रक्ष॑ धि॒या कृ॑तान् ॥
 अ॒नुल्ब॑णं व॒यत॑ जो॒गुवा॑-म॒पो म॑नुर् () भव॑ **जन॒या** दै॒व्यं ज॑नं ॥
 म॒नसो॑ ह॒विर॑सि प्र॒जाप॑तेर्व॒र्णो गा॑त्राणां ते गा॒त्रभा॑जो भू॒यास्म ॥ 6

TS 3.4.2.2 - Padam

त्वम् । तुरीया॑ । वशिनी॑ । वशा॑ । असि॑ । सकृत् । यत् । त्वा ।
मनसा॑ । गर्भः॑ । एति॑ । अशयत् ॥ वशा॑ । त्वम् । वशिनी॑ । गच्छ ।
देवान् । सत्याः । सन्तु॑ । यजमानस्य॑ । कामाः॑ ॥ अजा॑ । असि॑ ।
रयिष्ठेति॑ रयि – स्था । पृथिव्याम् । सीद॑ । ऊर्ध्वा॑ । अन्तरिक्षम् ।
उपेति॑ । तिष्ठस्व । दिवि॑ । ते । बृहत् । भाः ॥ तन्तुम् । तन्वन् ।
रजसः॑ । भानुम् । अन्विति॑ । इहि॑ । ज्योतिष्मतः॑ । पथः॑ । रक्ष ।
धिया॑ । कृतान् ॥ अनुल्बणम् । वयत॑ । जोगुवाम् । अपः॑ । मनुः() ।
भव॑ । जनय॑ । दैव्यम् । जनम् ॥ मनसः॑ । हविः॑ । असि॑ ।
प्रजापतेरिति॑ प्रजा – पतेः॑ । वर्णः॑ । गात्राणाम् । ते ।
गात्रभाज॑ इति गात्र – भाजः॑ । भूयास्म ॥ 6 (63)

(सरस्वत्यै स्वाहा – मनु – स्त्रयोदश च) (A2)

TS 3.4.3.1

इमे वै सहाऽऽस्तां॑ ते वायुर्व्यवात्॑ ते गर्भमदधातां॑ तꣳ सोमः॑
प्राजनय-दग्निरग्रसत॑ स एतं॑ प्रजापतिराग्नेय-मष्टाकपालमपश्यत् तं॑

नि॒र॒व॒प॒त् ते॒नै॒वै॒ना॒म॒ग्ने॒र॒धि॒ नि॒र॒क्री॒णा॒त् तस्मा॒द॒प्य॒न्य॒दे॒व॒त्या॒मा॒ल॒भ॒मा॒न॒
आ॒ग्ने॒य॒म॒ष्टा॒क॒पा॒लं पु॒र॒स्ता॒न्नि॒र्व॒पे॒द॒ग्ने॒रे॒वै॒ना॒म॒धि॒
निष्क्री॒याऽऽल॒भ॒ते यद् – [] 7

TS 3.4.3.1 - Padam

इ॒मे इति॑ । वै । स॒ह । आ॒स्ताम् । ते इति॑ । वा॒युः । वी॒ति । अ॒वा॒त् ।
ते इति॑ । गर्भ॑म् । अ॒द॒धा॒ताम् । तम् । सोमः॑ । प्रेति॑ । अ॒ज॒न॒य॒त् ।
अ॒ग्निः । अ॒ग्र॒स॒त । सः । ए॒तम् । प्र॒जा॒प॒ति॒रिति॑ प्र॒जा – प॒तिः ।
आ॒ग्ने॒यम् । अ॒ष्टा॒क॒पा॒ल॒मि॒त्य॒ष्टा – क॒पा॒लम् । अ॒प॒श्य॒त् । तम् ।
नि॒रिति॑ । अ॒व॒प॒त् । ते॒न । ए॒व । ए॒नाम् । अ॒ग्नेः । अ॒धि । नि॒रिति॑ ।
अ॒क्री॒णा॒त् । तस्मा॑त् । अ॒पी॒ति । अ॒न्य॒दे॒व॒त्या॒मि॒त्य॒न्य – दे॒व॒त्याम् ।
आ॒ल॒भ॒मा॒न इत्या॑ – ल॒भ॒मा॒नः । आ॒ग्ने॒यम् ।
अ॒ष्टा॒क॒पा॒ल॒मि॒त्य॒ष्टा–क॒पा॒लम् । पु॒र॒स्ता॒त् । नि॒रिति॑ । व॒पे॒त् । अ॒ग्नेः ।
ए॒व । ए॒नाम् । अ॒धी॒ति । निष्क्री॒येति॑ निः – क्री॒य । ए॒ति । ल॒भ॒ते ।
यत् । 7 (50)

TS 3.4.3.2

वा॒युर्व्य॒वात् तस्मा॑द्-वा॒यव्या॑ यदि॒मे गर्भ॑मद॒धातां॑ तस्मा॑द्-
द्या॒वापृ॑थिव्या॑ यत् सोमः॑ प्रा॒जनय॑द॒ग्निर॑ग्र॒सत॑ तस्मा॑द॒ग्नीषो॑मीया
यद॒नयो॑र्वि॒यत्यो॑र्वा॒गव॑दत् तस्मा॑त् सा॒रस्व॑ती यत् प्र॒जाप॑तिर॒ग्नेर॑धि
नि॒रक्री॑णात् तस्मा॑त् प्रा॒जाप॑त्या सा वा ए॒षा सर्व॑दे॒वत्या॑ यद॒जा व॑शा
वा॒यव्या॑मा ल॒भेत॑ भू॒तिकामो॑ वा॒युर्वै क्षे॑पिष्ठा दे॒वता॑ वा॒युमे॒व
स्वेन॑- [] 8

TS 3.4.3.2 - Padam

वा॒युः । व्य॒वादि॑ति वि - अ॒वात् । तस्मा॑त् । वा॒यव्या॑ । यत् ।
इ॒मे इति॑ । गर्भ॑म् । अ॒दधा॑ताम् । तस्मा॑त् । द्या॒वापृ॑थिव्येति॑
द्या॒वा - पृ॑थिव्या॑ । यत् । सोमः॑ । प्रेति॑ । अ॒जन॑यत् । अ॒ग्निः ।
अ॒ग्र॒सत॑ । तस्मा॑त् । अ॒ग्नीषो॑मीयेत्य॒ग्नी-सो॑मीया॑ । यत् । अ॒नयोः॑ ।
वि॒यत्यो॑रिति॑ वि - य॒त्योः । वाक् । अ॒वद॑त् । तस्मा॑त् । सा॒रस्व॑ती ।
यत् । प्र॒जाप॑तिरिति॑ प्र॒जा - प॑तिः । अ॒ग्नेः । अधी॑ति ।
नि॒रक्री॑णादि॑ति निः - अ॒क्री॑णात् । तस्मा॑त् ।

प्राजापत्येति प्राजा – पत्या । सा । वै । एषा । सर्वदेवत्येति
 सर्व – देवत्या ॥ यत् । अजा । वशा । वायव्याम् । एति । लभेत ।
 भूतिकाम इति भूति – कामः । वायुः । वै । क्षेपिष्ठा । देवता ॥
 वायुम् । एव । स्वेन । 8 (50)

TS 3.4.3.3

भागधेयेनोप धावति स एवैनं भूतिं गमयति द्यावापृथिव्यामा लभेत
 कृषमाणः प्रतिष्ठाकामो दिव एवास्मै पर्जन्यो वर्षति व्यस्यामोषधयो
 रोहन्ति समर्द्धुकमस्य सस्यं भवत्यग्नीषोमीयामा लभेत यः
 कामयेतान्नवानन्नादः स्यामित्यग्निनैवान्नमव रुन्धे
 सोमेनान्नाद्य-मन्नवानेवान्नादो भवति सारस्वतीमा लभेत य – [] 9

TS 3.4.3.3 - Padam

भागधेयेनेति भाग – धेयेन । उपेति । धावति । सः । एव । एनम् ।
 भूतिम् । गमयति । द्यावापृथिव्यामिति द्यावा – पृथिव्याम् । एति ।
 लभेत । कृषमाणः । प्रतिष्ठाकाम इति प्रतिष्ठा-कामः । दिवः । एव ।
 अस्मै । पर्जन्यः । वर्षति । वीति । अस्याम् । ओषधयः । रोहन्ति ।
 समर्द्धुकमिति सं – अर्द्धुकम् । अस्य । सस्यम् । भवति ।

अ॒ग्नी॒षो॒मी॒या॒मि॒त्य॒ग्नी॑-सो॒मी॒या॒म् । ए॒ति॑ । ल॒भे॒त॑ । यः । का॒म॒ये॒त॑ ।
अ॒न्न॒वा॒न्नि॒त्य॒न्न॑ - वा॒न् । अ॒न्ना॒द॒ इ॒त्य॒न्न॑ - अ॒दः॑ । स्या॒म् ।
इ॒ति॑ । अ॒ग्नि॒ना॑ । ए॒व । अ॒न्न॒म् । अ॒वे॒ति॑ । रु॒न्धे॑ । सो॒मे॒न॑ ।
अ॒न्ना॒द्य॒मि॒त्य॒न्न॑ - अ॒द्य॒म् । अ॒न्न॒वा॒न्नि॒त्य॒न्न॑ - वा॒न् । ए॒व ।
अ॒न्ना॒द॒ इ॒त्य॒न्न॑ - अ॒दः॑ । भ॒व॒ति॑ । सा॒र॒स्व॒ती॒म् । ए॒ति॑ ।

ल॒भे॒त॑ । यः । 9 (50)

TS 3.4.3.4

ई॒श्व॒रो॒ वा॒चो॒ व॒दि॒तोः॑ स॒न् वा॒चं॑ न॒व॒दे॒द्-वा॒ग्वै॑ स॒र॒स्व॒ती॒ स॒र॒स्व॒ती॒मे॒व
स्वे॒न॑ भा॒ग॒धे॒ये॒नो॒प॑ धा॒व॒ति॑ सै॒वा॒स्मि॒न् वा॒चं॑ द॒धा॒ति॑ प्रा॒जा॒प॒त्या॒मा
ल॒भे॒त॑ यः का॒म॒ये॒ता॒न॒भि॒जि॒त॒म॒भि॑ ज॒ये॒य॒मि॒ति॑ प्र॒जा॒प॒तिः॑ सर्वा॑ दे॒वता॑
दे॒वता॑भि॒-रे॒वा॒न॒भि॒जि॒त॒म॒भि॑ ज॒य॒ति॑ वा॒य॒व्य॒यो॒पा॒क॒रो॒ति॑
वा॒यो॒रे॒वै॒ना॒म॒व॒रु॒द्ध्य॑ ऽऽल॒भ॒त॑ आ॒कू॒त्यै॑ त्वा॒ का॒मा॒य॒ त्वे॑ - [] 10

TS 3.4.3.4 - Padam

ई॒श्व॒रः॑ । वा॒चः॑ । व॒दि॒तोः॑ । स॒न् । वा॒च॒म् । न॑ । व॒दे॒त् । वाक् । वै ।
स॒र॒स्व॒ती॒ । स॒र॒स्व॒ती॒म् । ए॒व । स्वे॒न॑ । भा॒ग॒धे॒ये॒ने॒ति॑ भा॒ग॑ - धे॒ये॒न॑ ।

उ॒पेति॑ । धा॒वति॑ । सा । ए॒व । अ॒स्मिन् । वाच॑म् । द॒धाति॑ ।
 प्रा॒जाप॑त्यामि॒ति प्रा॒जा – प॒त्याम् । ए॒ति । ल॒भेत॑ । यः । का॒मये॑त ।
 अ॒नभि॑जित॒मित्य॑न॒भि – जि॒तम् । अ॒भीति॑ । ज॒येय॑म् । इति॑ ।
 प्र॒जाप॑तिरि॒ति प्र॒जा – प॒तिः । सर्वाः॑ । दे॒वताः॑ । दे॒वता॑भिः । ए॒व ।
 अ॒नभि॑जित॒मित्य॑न॒भि – जि॒तम् । अ॒भीति॑ । ज॒यति॑ । वा॒यव्य॑या ।
 उ॒पाक॑रोती॒युप – आ॑करोति । वा॒योः । ए॒व । ए॒नाम् ।
 अ॒वरु॑द्ध्येत्य॒व – रु॒द्ध्य । ए॒ति । ल॒भते॑ । आ॒कूत्या॑ इत्या – कू॒त्यै ।
 त्वा । का॒माय॑ । त्वा । 10 (50)

TS 3.4.3.5

त्या॒ह य॒थाय॑जु॒रेवै॑तत् कि॒क्कि॒टाका॑रं जु॒होति॑ कि॒क्कि॒टाका॑रेण॒ वै ग्रा॒म्याः
 प॒शवो॑ र॒मन्ते॑ प्रा॒ऽऽर॑ण्याः प॒तन्ति॑ यत् कि॒क्कि॒टाका॑रं जु॒होति॑
 ग्रा॒म्याणां॑ प॒शूनां॑ धृ॒त्यै पर्य॑ग्नौ क्रि॒यमा॑णे जु॒होति॑ जी॒वन्ती॑मे॒वैनां॑
 सु॒वर्गं॑ लो॒कं ग॑मयति॒ त्वं तु॒रीया॑ व॒शिनी॑ व॒शाऽसी॑त्या॒ह दे॒वत्रै॑वैनां॑
 ग॑मयति॒ स॒त्याः स॒न्तु य॑ज॒मान॑स्य॒ कामा॑ इत्या॒हैष॑ वै का॒मो – [] 11

TS 3.4.3.5 - Padam

इति॑ । आ॒ह । य॒था॒य॒जु॒रिति॑ यथा – य॒जुः । ए॒व । ए॒तत् ।
कि॒क्कि॒टा॒का॒र॒मिति॑ कि॒क्कि॒टा – का॒रम् । जु॒होति॑ । कि॒क्कि॒टा॒का॒रेणेति॑
कि॒क्कि॒टा – का॒रेण॑ । वै । ग्रा॒म्याः । प॒शवः॑ । र॒मन्ते॑ । प्रेति॑ ।
आ॒र॒ण्याः । प॒त॒न्ति॑ । यत् । कि॒क्कि॒टा॒का॒र॒मिति॑ कि॒क्कि॒टा – का॒रम् ।
जु॒होति॑ । ग्रा॒म्याणा॑म् । प॒शूना॑म् । धृ॒त्यै॑ । प॒र्य॒ग्ना॒विति॑ प॒रि-अ॒ग्नौ ।
क्रि॒य॒मा॒णे । जु॒होति॑ । जी॒व॒न्ती॑म् । ए॒व । ए॒नाम् । सु॒व॒र्ग॒मिति॑
सु॒वः – ग॒म् । लो॒कम् । ग॒म॒य॒ति॑ । त्वम् । तु॒रीया॑ । व॒शिनी॑ । व॒शा ।
अ॒सि॒ । इति॑ । आ॒ह । दे॒व॒त्रेति॑ दे॒व – त्रा॑ । ए॒व । ए॒नाम् । ग॒म॒य॒ति॑ ।
स॒त्याः । स॒न्तु॑ । य॒ज॒मा॒न॒स्य॑ । का॒माः॑ । इति॑ । आ॒ह । ए॒षः । वै ।
का॒मः । 11 (50)

TS 3.4.3.6

य॒ज॒मा॒न॒स्य॑ य॒द॒ना॒र्त॑ उ॒दृ॒चं॑ ग॒च्छ॒ति॑ त॒स्मा॒दे॒व॒मा॒हा॒ऽजा॒ऽसि॑
र॒यि॒ष्ठे॒त्या॒है॒ष्वे॒वा॒नां॑ लो॒केषु॑ प्र॒ति॑ ष्ठा॒प॒य॒ति॑ दि॒वि॒ ते॑ बृ॒हद्॑ भा इ॒त्या॒ह
सु॒व॒र्ग॑ ए॒वा॒स्मै॑ लो॒के॒ ज्यो॒ति॒र् द॒धा॒ति॑ त॒न्तुं॑ त॒न्वन्॑ र॒ज॒सो॑

भानु॑मन्वि॒हीत्या॑हे॒मा-ने॒वास्मै॑ लो॒कान् ज्योति॑ष्मतः करोत्यनु॒ल्बणं॑
वय॑त जो॒गुवा॑-मप॒ इत्या॑-[] 12

TS 3.4.3.6 - Padam

यज॑मानस्य । यत् । अ॒नार्तः॑ । उ॒दृच॑मित्युत् - ऋ॒चम् । गच्छ॑ति ।
तस्मा॑त् । ए॒वम् । आ॒ह । अ॒जा । अ॒सि । र॒यि॒ष्ठेति॑ रयि - स्था ।
इति॑ । आ॒ह । ए॒षु । ए॒व । ए॒नाम् । लो॒केषु॑ । प्र॒तीति॑ । स्था॒पय॑ति ।
दि॒वि । ते । बृ॒हत् । भाः॑ । इति॑ । आ॒ह । सु॒वर्ग॑ इति॑ सुवः-॒गे ।
ए॒व । अ॒स्मै । लो॒के । ज्योतिः॑ । द॒धाति॑ । तन्तु॑म् । तन्व॑न् ।
रज॑सः । भानु॑म् । अ॒न्वि॒ति । इ॒हि । इति॑ । आ॒ह । इ॒मान् । ए॒व ।
अ॒स्मै । लो॒कान् । ज्योति॑ष्मतः । करो॑ति । अ॒नु॒ल्बण॑म् । वय॑त ।
जो॒गुवा॑म् । अपः॑ । इति॑ । 12 (50)

TS 3.4.3.7

-ह॒ यदे॒व य॒ज्ञ उ॒ल्बणं॑ क्रि॒यते॑ तस्यै॒वैषा॑ शान्ति॒र्मनु॑र्भव
जन॑या दै॒व्यं ज॒नमि॑त्याह॒ मान॑व्यो॒ वै प्र॒जास्ता॑ ए॒वाऽऽद्याः॑
कुरु॑ते॒ मन॑सो॒ ह॒वि॒रसी॑त्याह॒ स्व॒गाकृ॑त्यै॒ गात्रा॑णां॒ ते गा॒त्रभा॑जो

भू॒यास्मे॒त्याहाऽऽ*शि॒षमे॒वैता॒मा शा॒स्ते तस्यै॑ वा ए॒तस्या॑
ए॒कमे॒वादे॒वय॒जनं॑ य॒दाल॒ब्धायाम॒भ्रो – [] 13

TS 3.4.3.7 - Padam

आ॒ह । यत् । ए॒व । य॒ज्ञे । उ॒ल्ब॒णम् । क्रि॒यते॑ । तस्य॑ । ए॒व । ए॒षा ।
शा॒न्तिः । म॒नुः । भ॒व । ज॒नय॑ । दै॒व्यम् । ज॒नम् । इति॑ । आ॒ह ।
मा॒नव्यः॑ । वै । प्र॒जा इति॑ प्र – जाः । ताः । ए॒व । आ॒द्याः । कु॒रुते॑ ।
म॒नसः॑ । ह॒विः । अ॒सि । इति॑ । आ॒ह । स्व॒गाकृ॒त्या इति॑
स्व॒गा – कृ॒त्यै । गा॒त्राणा॒म् । ते । गा॒त्रभा॒ज इति॑ गा॒त्र – भा॒जः ।
भू॒यास्म । इति॑ । आ॒ह । आ॒शिष॒मित्या॑ – शि॒षम् । ए॒व । ए॒ताम् ।
ए॒ति । शा॒स्ते । तस्यै॑ । वै । ए॒तस्याः॑ । ए॒कम् । ए॒व ।
अ॒दे॒वय॒जन॒मित्य॑दे॒व – य॒जन॒म् । यत् ।

आ॒ल॒ब्धायामि॒त्या – ल॒ब्धायाम् । अ॒भ्रः । 13 (50)

TS 3.4.3.8

भ॒वति॑ य॒दाल॒ब्धायाम॒भ्रः स्या॒दप्सु॑ वा॒प्रवे॒शये॒थ् सर्वा॑ वा
प्रा॒श्नी॒याद् य॒दप्सु॑ प्र॒वे॒शये॒द् य॒ज्ञवे॒शसं॑ कुर्या॒थ् सर्वा॑मे॒व

प्रा॒ञ्जी॒यादि॒न्द्रि॒यमे॒वाऽऽत्मन्॑ ध॒त्ते सा॒ वा ए॒षा त्र॒याणा॒मे॒वाव॑रुद्धा
सँ॒व॒त्स॒रस॒दः स॒हस्र॑या॒जिनो॑ गृ॒हमे॒धिन॑स्त ए॒वैत॑या
यजे॑रन् तेषा॒मे॒वैषा॑ ऽऽप्ता ॥ 14

TS 3.4.3.8 - Padam

भ॒वति॑ । यत् । आ॒ल॒ब्धा॒यामि॒त्या – ल॒ब्धा॒याम् । अ॒भ्रः । स्यात् ।
अ॒प्स्वि॒त्यप्–सु । वा । प्र॒वे॒शये॒दिति॑ प्र – वे॒शये॑त् । सर्वा॑म् । वा ।
प्रेति॑ । अ॒ञ्जी॒यात् । यत् । अ॒प्स्वि॒त्यप् – सु । प्र॒वे॒शये॒दिति॑
प्र – वे॒शये॑त् । य॒ज्ञवे॒शस॒मिति॑ य॒ज्ञ – वे॒शस॑म् । कुर्या॑त् । सर्वा॑म् ।
ए॒व । प्रेति॑ । अ॒ञ्जी॒यात् । इ॒न्द्रि॒यम् । ए॒व । आ॒त्मन् । ध॒त्ते । सा ।
वै । ए॒षा । त्र॒याणा॒म् । ए॒व । अ॒व॒रुद्धे॑त्य॒व – रुद्धा॑ ।
सँ॒व॒त्स॒रस॒द इति॑ सँ॒व॒त्स॒र – स॒दः । स॒हस्र॑या॒जिन इति॑
स॒हस्र॑ – या॒जिनः॑ । गृ॒हमे॒धिन इति॑ गृ॒ह – मे॒धिनः॑ । ते । ए॒व ।
ए॒तया॑ ॥ य॒जे॒रन् । तेषा॑म् । ए॒व । ए॒षा । आ॒प्ता ॥ 14 (42)

(यथ् – स्वेन – सारस्वतीमा लभेत यः – कामाय त्वा – कामो –
ऽप इत्य – भ्रो – द्विचत्वारिंशच्च) (A3)

TS 3.4.4.1

चित्तं च चित्तिश्चाऽऽकूतं चाऽऽकूतिश्च विज्ञातं च विज्ञानं च
मनश्च शक्वरीश्च दर्शश्च पूर्णमासश्च बृहच्च रथन्तरं च
प्रजापतिर्जयानिन्द्राय वृष्णे प्रायच्छदुग्रः पृतनाज्येषु तस्मै विशः
स-मनमन्त सर्वाः स उग्रः सहि हव्यो बभूवदेवासुराः सयत्ता
आसन्थ् स इन्द्रः प्रजापतिमुपाऽ () धावत् तस्मा एताञ्जयान्
प्रायच्छत् तानजुहोत् ततो वै देवा असुरानजयन् यदजयन् तज्जयानां
जयत्व७ स्पर्द्धमानेनैते होतव्या जयत्येव तां पृतनां ॥ 15

TS 3.4.4.1 - Padam

चित्तम् । च । चित्तिः । च । आकूतमित्या - कूतम् । च ।
आकूतिरित्या - कूतिः । च । विज्ञातमिति वि - ज्ञातम् । च ।
विज्ञानमिति वि-ज्ञानम् । च । मनः । च । शक्वरीः । च । दर्शः ।
च । पूर्णमास इति पूर्ण - मासः । च । बृहत् । च । रथन्तरमिति
रथं - तरम् । च । प्रजापतिरिति प्रजा - पतिः । जयान् । इन्द्राय ।
वृष्णे । प्रेति । अयच्छत् । उग्रः । पृतनाज्येषु । तस्मै । विशः ।

समि॑ति । अ॒न॒म॒न्त॒ । स॒र्वाः॑ । सः । उ॒ग्रः । सः । हि । ह॒व्यः ।
 ब॒भू॒व । दे॒वा॒सु॒रा इति॑ दे॒व – अ॒सु॒राः । सँ॑य॒त्ता इति॑ सं – य॒त्ताः ।
 आ॒स॒न् । सः । इ॒न्द्रः । प्र॒जाप॑तिमि॒ति प्र॒जा – प॒तिम् । उपे॑ति () ।
 अ॒धा॒वत् । तस्मै॑ । ए॒तान् । ज॒यान् । प्रे॑ति । अ॒य॒च्छत् । तान् ।
 अ॒जु॒होत् । ततः॑ । वै । दे॒वाः । अ॒सु॒रान् । अ॒ज॒यन् । यत् ।
 अ॒ज॒यन् । तत् । ज॒याना॑म् । ज॒य॒त्वमि॑ति ज॒य – त्वम् ।
 स्पर्द्ध॑मानेन । ए॒ते । हो॒त॒व्याः॑ । ज॒यति॑ । ए॒व । ताम् ।
 पृ॒त॒नाम् ॥ 15 (75) (उ॒प – पञ्च॑वि॒ंशति॑श्च) (A4)

TS 3.4.5.1

अ॒ग्नि॒र्भू॒ताना॑मधि॒पतिः॑ स मा ऽव॒त्विन्द्रो॑ ज्ये॒ष्ठानां॑ य॒मः पृ॑थि॒व्या
 वा॒यु॒रन्त॑रि॒क्षस्य॑ सूर्यो॑दि॒वश्च॒न्द्रमा॑ नक्ष॒त्राणां॑ बृ॒ह॒स्पति॑र्ब्रह्म॒णो
 मि॒त्रः स॒त्यानां॑ व॒रु॒णो॒ऽपा॒ं॒ समु॒द्रः स्रो॒त्याना॑म॒न्नं॒
 सा॒म्राज्या॑ना॒मधि॒पति॑ तन्मा ऽव॒तु सोम॑ ओष॒धीनां॑ स॒विता प्र॑स॒वानां॑
 रु॒द्रः प॑शू॒नां त्वष्टा॑ रू॒पाणां॑ वि॒ष्णुः पर्व॑तानां म॒रुतो॑
 ग॒णाना॑मधि॒पत॑यस्ते मा ऽव॒न्तु पि॒तरः पि॒ताम॑हाः परे ऽव॒रे ()

त॒ता-स्त॒ताम॒हा इ॒ह मा॒ ऽव॒त ।

अ॒स्मिन् ब्र॒ह्मन् अ॒स्मिन् क्ष॒त्रे ऽस्या॒मा शि॒ष्य॒स्यां पु॒रो धा॒याम॒स्मिन्
क॒र्मन् न॒स्यां दे॒वहू॒त्यां ॥ 16

TS 3.4.5.1 - Padam

अ॒ग्निः । भू॒ता॒नाम् । अ॒धि॒प॒ति॒रि॒त्य॒धि- प॒तिः । सः । मा । अ॒व॒तु ।
इ॒न्द्रः । ज्ये॒ष्ठा॒नाम् । य॒मः । पृ॒थि॒व्याः । वा॒युः । अ॒न्त॒रि॒क्ष॒स्य ।
सू॒र्यः । दि॒वः । च॒न्द्र॒माः । नक्ष॒त्रा॒णाम् । बृ॒ह॒स्प॒तिः । ब्र॒ह्म॒णः ।
मि॒त्रः । स॒त्या॒नाम् । व॒रु॒णः । अ॒पाम् । स॒मु॒द्रः । स्रो॒त्या॒नाम् ।
अ॒न्नम् । सा॒म्रा॒ज्या॒नामि॒ति सां - रा॒ज्या॒नाम् । अ॒धि॒प॒ती॒त्य॒धि-प॒ति ।
तत् । मा । अ॒व॒तु । सो॒मः । ओष॑धी॒नाम् । स॒वि॒ता । प्र॒स॒वा॒नामि॒ति
प्र - स॒वा॒नाम् । रु॒द्रः । प॒शू॒नाम् । त्व॒ष्टा । रू॒पा॒णाम् । वि॒ष्णुः ।
प॒र्व॒ता॒नाम् । म॒रु॒तः । ग॒णा॒नाम् । अ॒धि॒प॒तय॒ इत्य॒धि - प॒तयः । ते ।
मा । अ॒व॒न्तु । पि॒तरः । पि॒ता॒म॒हाः । प॒रे । अ॒व॒रे () । त॒ताः ।
त॒ता॒म॒हाः । इ॒ह । मा । अ॒व॒त ॥ अ॒स्मिन् । ब्र॒ह्मन् । अ॒स्मिन् ।
क्ष॒त्रे । अ॒स्याम् । आ॒शि॒षी॒त्या - शि॒षि । अ॒स्याम् ।

पुरो॑धायामि॑ति पुरः – धायाम् । अ॒स्मिन् । कर्मन् । अ॒स्याम् ।

देव॑हूत्यामि॑ति देव – हूत्याम् ॥ 16 (67)

(अ॒वरे – सप्त॑दश च) (A5)

TS 3.4.6.1

दे॒वा वै यद् य॒ज्ञे ऽकु॑र्वत॒ तद॑सुरा अकुर्वत॒ ते दे॒वा
ए॒तान॑भ्या॒ताना॑नपश्यन् तान॑भ्यातन्वत॒ यद् दे॒वानां॑ कर्मा॒ऽऽसी॑दा॒र्ध्यत॑
तद् यद॑सुराणां॒ न तदा॑र्ध्यत॒ येन॑ कर्म॒णेश्से॑त् तत्र॑ होत॒व्या ऋ॒द्ध्नो॑त्ये॒व
तेन॑ कर्म॒णा यद्वि॑श्चे दे॒वाः स॒मभ॑रन् तस्मा॑दभ्या॒ताना॑ वैश्चदे॒वाय॑त्-
प्र॒जाप॑तिर्ज॒यान् प्रा॑यच्छत् तस्मा॒ज्जयाः॑ प्राजाप॒त्या – [] 17

TS 3.4.6.1 - Padam

दे॒वाः । वै । यत् । य॒ज्ञे । अकु॑र्वत । तत् । अ॒सुराः । अकु॑र्वत । ते ।
दे॒वाः । ए॒तान् । अ॒भ्या॒ताना॑नित्य॒भि – आ॒तानान् । अ॒पश्य॑न् ।
तान् । अ॒भ्यात॑न्वतेत्य॒भि – आ॒तन्वत॑ । यत् । दे॒वाना॑म् । कर्म॑ ।
आ॒सीत् । आ॒र्ध्यत॑ । तत् । यत् । अ॒सुरा॑णाम् । न । तत् ।
आ॒र्ध्यत॑ । येन॑ । कर्म॒णा । ई॒शे॑त् । तत्र॑ । होत॒व्याः । ऋ॒द्ध्नो॑ति ।

ए॒व । ते॒न । क॒र्म॒णा । यत् । वि॒श्वे ॥ दे॒वाः । स॒म॒भ॒र॒न्नि॒ति
सं – अ॒भ॒र॒न् । तस्मा॑त् । अ॒भ्या॒ता॒ना इ॒त्य॒भि – आ॒ता॒नाः । वै॒श्व॒दे॒वा
इति॑ वै॒श्व – दे॒वाः । यत् । प्र॒जा॒प॒ति॒रिति॑ प्र॒जा – प॒तिः । ज॒या॒न् ।
प्रेति॑ । अ॒य॒च्छत् । तस्मा॑त् । ज॒याः ।

प्रा॒जा॒प॒त्या इति॑ प्रा॒जा–प॒त्याः । 17 (50)

TS 3.4.6.2

यद्–रा॒ष्ट्र॒भृ॒द्भी रा॒ष्ट्र॒मा ऽद॒दत् तद्–रा॒ष्ट्र॒भृ॒ता ऽ रा॒ष्ट्र॒भृ॒त्त्वं ते दे॒वा
अ॒भ्या॒ता॒नै–र॒सु॒रा॒न॒भ्या॒त॒न्वत् ज॒यै–र॒ज॒य॒न् रा॒ष्ट्र॒भृ॒द्भी रा॒ष्ट्र॒मा ऽद॒दत्
यद्–दे॒वा अ॒भ्या॒ता॒नैर॒सु॒रा॒न॒भ्या॒त॒न्वत् तद॒भ्या॒ता॒ना॒ना॒म॒भ्या॒ता॒न॒त्वं
य॒ज्ज॒यैर॒ज॒य॒न् तज्ज॒या॒नां ज॒य॒त्वं यद्–रा॒ष्ट्र॒भृ॒द्भी रा॒ष्ट्र॒मा ऽद॒दत्
तद्–रा॒ष्ट्र॒भृ॒ता ऽ रा॒ष्ट्र॒भृ॒त्त्वं ततो॑ दे॒वा अ॒भ॒व॒न् प॒रा॒ऽसु॒रा यो
भ्रातृ॑व्य॒वा॒न्त् स्या॒त् स () ए॒ता॒न् जु॒हु॒या॒द॒भ्या॒ता॒नैरे॒व
भ्रातृ॑व्या॒न॒भ्या॒त॒नु॒ते ज॒यैर्ज॒य॒ति रा॒ष्ट्र॒भृ॒द्भी रा॒ष्ट्र॒मा द॒त्ते भ॒व॒त्या॒त्म॒ना
प॒रा॒ऽस्य॑ भ्रातृ॑व्यो भ॒व॒ति ॥ 18

TS 3.4.6.2 - Padam

यत् । राष्ट्रभृद्भिरिति राष्ट्रभृत् – भिः । राष्ट्रम् । एति । अददत् । तत् ।
राष्ट्रभृतामिति राष्ट्र – भृताम् । राष्ट्रभृत्वमिति राष्ट्रभृत् – त्वम् । ते ।
देवाः । अभ्यातानैरित्यभि – आतानैः । असुरान् ।
अभ्यातन्वतेत्यभि – आतन्वत । जयैः । अजयन् ।
राष्ट्रभृद्भिरिति राष्ट्रभृत् – भिः । राष्ट्रम् । एति । अददत् । यत् ।
देवाः । अभ्यातानैरित्यभि – आतानैः । असुरान् ।
अभ्यातन्वतेत्यभि – आतन्वत । तत् ।
अभ्यातानानामित्यभि – आतानानाम् ।
अभ्यातानत्वमित्यभ्यातान – त्वम् । यत् । जयैः । अजयन् । तत् ।
जयानाम् । जयत्वमिति जय – त्वम् । यत् । राष्ट्रभृद्भिरिति
राष्ट्रभृत् – भिः । राष्ट्रम् । एति । अददत् । तत् । राष्ट्रभृतामिति
राष्ट्र – भृताम् । राष्ट्रभृत्वमिति राष्ट्रभृत् – त्वम् । ततः । देवाः ।
अभवन् । परेति । असुराः । यः । भ्रातृव्यवानिति भ्रातृव्य – वान् ।
स्यात् । सः () । एतान् । जुहुयात् । अभ्यातानैरित्यभि-आतानैः ।

ए॒व । भ्रा॒तृ॒व्यान् । अ॒भ्या॒तनु॒त इत्य॑भि – आ॒तनु॑ते । ज॒यैः॑ । ज॒य॒ति॒ ।
 रा॒ष्ट्र॒भृ॒द्भिरि॑ति रा॒ष्ट्र॒भृ॒त् – भिः॑ । रा॒ष्ट्र॒म् । ए॒ति॒ । द॒त्ते॒ । भ॒व॒ति॒ ।
 आ॒त्म॒ना॑ । प॒रेति॑ । अ॒स्य॒ । भ्रा॒तृ॒व्यः॑ । भ॒व॒ति॒ ॥ 18 (68)

(प्रा॒जा॒प॒त्याः – सोऽ – ष्टा द॑श च) (A6)

TS 3.4.7.1

ऋ॒ता॒षा॒ड् ऋ॒त॒धा॒मा॒ऽग्नि॑र् गन्ध॑र्वस्त-स्यौष॑धयोऽप्सर॑स ऊ॒र्जो॑ नाम
 स इ॒दं ब्र॑ह्म क्ष॒त्रं पा॑तु ता इ॒दं ब्र॑ह्म क्ष॒त्रं पा॑न्तु तस्मै॑ स्वाहा ताभ्यः
 स्वाहा स॒ऽहि॒तो वि॒श्व॒सा॒मा सू॒र्यो॑ गन्ध॑र्व-स्तस्य म॒री॒च॒योऽप्सर॑स
 आ॒यु॒वः सु॒षु॒म्नः सू॒र्य॒र॒श्मि-श्च॑न्द्र॒मा गन्ध॑र्व-स्तस्य नक्ष॑त्राण्यप्सर॑सो
 बे॒कुर॑योभु॒ज्युः सु॒प॒र्णो॑ य॒ज्ञो गन्ध॑र्व-स्तस्य दक्षि॑णा
 अ॒प्सर॑सः स्त॒वाः प्र॒जा॒प॒तिर् वि॒श्व॒क॒र्मा म॒नो – [] 19

TS 3.4.7.1 - Padam

ऋ॒ता॒षा॒ट् । ऋ॒त॒धा॒मेत्यृ॑त – धा॒मा । अ॒ग्निः॑ । गन्ध॑र्वः । त॒स्य॑ ।
 ओष॑धयः । अ॒प्सर॑सः । ऊ॒र्जः॑ । ना॒म । सः॑ । इ॒दम् । ब्र॑ह्म ।
 क्ष॒त्रम् । पा॑तु । ताः॑ । इ॒दम् । ब्र॑ह्म । क्ष॒त्रम् । पा॑न्तु । तस्मै॑ । स्वाहा॑ ।

ताभ्यः॑ । स्वाहा॑ । स॒ञ्॒हित॑ इति॑ सं – हि॒तः॑ । वि॒श्व॒सा॒मेति॑
वि॒श्व – सा॒मा । सूर्यः॑ । गन्धर्वः॑ । तस्य॑ । मरीचयः॑ । अ॒प्सर॑सः ।
आयुव॑ इत्या॑ – युवः॑ । सु॒षु॒म्न इति॑ सु – सु॒म्नः॑ । सूर्य॑र॒श्मि॒रिति॑
सूर्य॑-र॒श्मिः॑ । च॒न्द्र॒माः॑ । गन्धर्वः॑ । तस्य॑ । नक्ष॑त्राणि । अ॒प्सर॑सः ।
बे॒कुर॑यः । भु॒ज्युः॑ । सु॒पर्ण॑ इति॑ सु – पर्णः॑ । य॒ज्ञः॑ । गन्धर्वः॑ ।
तस्य॑ । दक्षि॑णाः । अ॒प्सर॑सः । स्त॒वाः॑ । प्र॒जा॒पति॑रिति॑ प्र॒जा-प॑तिः ।
वि॒श्वक॑र्मेति॑ वि॒श्व – क॒र्मा । मनः॑ । 19 (50)

TS 3.4.7.2

गन्धर्व॑स्तस्य॑र्ख॒सामान्य॑प्सर॒सो वह्न्य॑इषि॒रो वि॒श्वव्य॑चा वातो॑
गन्धर्व॑-स्तस्याऽऽपो॑ ऽप्सर॒सो मु॒दाभु॑वनस्य पते॒ यस्य॑ त उ॒परि॑
गृ॒हा इ॒ह च॑ ।
स नो॑ रा॒स्वाज्या॑नि॒ ऽ रा॒यस्पोष॑ ऽ सु॒वीर्य॑ ऽ सं॒वँ॒त्सरी॑णा॒ स्व॒स्तिं ॥
पर॑मे॒ष्यधि॑पतिर् मृत्यु॑र् गन्धर्व॑-स्तस्य॑ वि॒श्वम॑प्सर॒सो भुवः॑ सु॒क्षितिः॑
सु॒भूति॑र् भ॒द्रकृ॑त् सु॒वर्वा॑न् प॒र्जन्यो॑ गन्धर्व॑-स्तस्य॑ वि॒द्युतो॑ ऽप्सर॒सो
रुचो॑ दू॒रेहे॑ति-रमृ॒डयो॑ – [] 20

TS 3.4.7.2 - Padam

गन्धर्वः । तस्य । ऋक्सामानीत्यृक्-सामानि । अप्सरसः । वह्नयः ।
इषिरः । विश्वव्यचा इति विश्व – व्यचाः । वातः । गन्धर्वः । तस्य ।
आपः । अप्सरसः । मुदाः । भुवनस्य । पते । यस्य । ते । उपरि ।
गृहाः । इह । च ॥ सः । नः । रास्व । अज्यानिम् । रायः । पोषम् ।
सुवीर्यमिति सु – वीर्यम् । सँवत्सरीणामिति सं – वत्सरीणाम् ।
स्वस्तिम् ॥ परमेष्ठी । अधिपतिरित्यधि – पतिः । मृत्युः । गन्धर्वः ।
तस्य । विश्वम् । अप्सरसः । भुवः । सुक्षितिरिति सु – क्षितिः ।
सुभूतिरिति सु – भूतिः । भद्रकृदिति भद्र – कृत् । सुवर्वानिति
सुवः – वान् । पर्जन्यः । गन्धर्वः । तस्य । विद्युत इति वि-द्युतः ।
अप्सरसः । रुचः । दूरेहेतिरिति दूरे – हेतिः । अमृडयः । 20 (50)

TS 3.4.7.3

मृत्युर्गन्धर्व-स्तस्य प्रजा अप्सरसो भीरुवश्चारुः कृपणकाशी
कामो गन्धर्व-स्तस्याऽऽधयोऽप्सरसः शोचयन्तीर्नाम स इदं ब्रह्म
क्षत्रं पातु ता इदं ब्रह्म क्षत्रं पान्तु तस्मै स्वाहा ताभ्यः स्वाहा स

नो॑ भुवनस्य॑ पते॑ यस्य॑ त॒ उपरि॑ गृहा॑ इह॑ च॑ ।

उरु॑ ब्रह्म॑णे ऽस्मै॑ क्षत्राय॑ महि॑ शर्म॑ यच्छ॑ ॥ 21

TS 3.4.7.3 - Padam

मृत्युः॑ । गन्धर्वः॑ । तस्य॑ । प्रजा॑ इति॑ प्र – जाः । अ॒प्सरसः॑ ।
भीरुवः॑ । चारुः॑ । कृ॒पण॑काशीति॑ कृ॒पण॑-काशी । कामः॑ । गन्धर्वः॑ ।
तस्य॑ । आ॒धय॑ इत्या॑ – धयः॑ । अ॒प्सरसः॑ । शोच॑यन्तीः । नाम॑ ।
सः । इ॒दम् । ब्रह्म॑ । क्ष॒त्रम् । पा॒तु । ताः । इ॒दम् । ब्रह्म॑ । क्ष॒त्रम् ।
पा॒न्तु । तस्मै॑ । स्वाहा॑ । ताभ्यः॑ । स्वाहा॑ । सः । नः॑ । भुवनस्य॑ ।
पते॑ । यस्य॑ । ते॑ । उपरि॑ । गृहाः॑ । इह॑ । च॑ ॥ उरु॑ । ब्रह्म॑णे ।
अ॒स्मै । क्ष॒त्राय॑ । महि॑ । शर्म॑ । यच्छ॑ ॥ 21 (46)

(मनो॑ – ऽमृ॒डयः॑ – षट्च॑त्वारि॒ंशच्च॑) (A7)

TS 3.4.8.1

राष्ट्र॑कामाय॑ हो॒तव्या॑ रा॒ष्ट्रं वै॑ रा॒ष्ट्रभृ॑तो रा॒ष्ट्रेणै॒वास्मै॑ रा॒ष्ट्रम॑व रुन्धे
रा॒ष्ट्रमे॒व भ॑वत्यात्मने॑ हो॒तव्या॑ रा॒ष्ट्रं वै॑ रा॒ष्ट्रभृ॑तो रा॒ष्ट्रं प्र॒जा रा॒ष्ट्रं प॒शवो॑
रा॒ष्ट्रं यच्छ्रे॑ष्ठो भवति॑ रा॒ष्ट्रेणै॒व रा॒ष्ट्रम॑व रुन्धे॑ वसिष्ठः॑ स॒माना॑नां भवति॑

ग्राम॑कामा॒य हो॒तव्या॑ रा॒ष्ट्रं वै॑ रा॒ष्ट्रभृ॑तो रा॒ष्ट्रं स॒जा॒ता रा॒ष्ट्रेणै॒वास्मै॑
रा॒ष्ट्रं स॒जा॒तान॑व रुन्धे॑ ग्रा॒म्ये – [] 22

TS 3.4.8.1 - Padam

रा॒ष्ट्रका॑मा॒येति॑ रा॒ष्ट्र – का॒मा॒य । हो॒तव्याः॑ । रा॒ष्ट्रम् । वै । रा॒ष्ट्रभृ॑त इति॑
रा॒ष्ट्र – भृ॑तः । रा॒ष्ट्रेण॑ । ए॒व । अ॒स्मै । रा॒ष्ट्रम् । अ॒वेति॑ । रुन्धे॑ ।
रा॒ष्ट्रम् । ए॒व । भ॒वति॑ । आ॒त्मनै॑ । हो॒तव्याः॑ । रा॒ष्ट्रम् । वै ।
रा॒ष्ट्रभृ॑त इति॑ रा॒ष्ट्र – भृ॑तः । रा॒ष्ट्रम् । प्र॒जेति॑ प्र – जा । रा॒ष्ट्रम् ।
प॒शवः॑ । रा॒ष्ट्रम् । यत् । श्रेष्ठः॑ । भ॒वति॑ । रा॒ष्ट्रेण॑ । ए॒व । रा॒ष्ट्रम् ।
अ॒वेति॑ । रुन्धे॑ । व॒सिष्ठः॑ । स॒मा॒ना॒नाम् । भ॒वति॑ । ग्रा॒मका॑मा॒येति॑
ग्रा॒म – का॒मा॒य । हो॒तव्याः॑ । रा॒ष्ट्रम् । वै । रा॒ष्ट्रभृ॑त इति॑ रा॒ष्ट्र-भृ॑तः ।
रा॒ष्ट्रम् । स॒जा॒ता इति॑ स – जा॒ताः । रा॒ष्ट्रेण॑ । ए॒व । अ॒स्मै । रा॒ष्ट्रम् ।
स॒जा॒तानि॑ति स – जा॒तान् । अ॒वेति॑ । रुन्धे॑ । ग्रा॒मी । 22 (50)

TS 3.4.8.2

–व भ॑वत्यधि॒दे॒वने॑ जुहोत्यधि॒दे॒वन॑ ए॒वास्मै॑ स॒जा॒तान॑व रुन्धे॑
त ए॒न॒मव॑रु॒द्धा उप॑ तिष्ठन्ते रथ॒मुख॑ ओज॒स्काम॑स्य हो॒तव्या॑ ओजो॒ वै

रा॒ष्ट्र॒भू॒त ओ॒जो रथ॑ ओ॒ज॒सै॒वास्मा॑ ओ॒जोऽव॑ रु॒न्ध ओ॒ज॒स्व्ये॒व भव॑ति
यो रा॒ष्ट्राद॑प॒भू॒तः स्या॑त् तस्मै॑ हो॒तव्या॑ याव॑न्तोऽस्य॑ रथाः॑ स्यु-स्तान्
ब्रू॒याद् यु॒ङ्ध्व-मि॑ति रा॒ष्ट्रमे॒वास्मै॑ यु॒नक्त्या॑ - [] 23

TS 3.4.8.2 - Padam

ए॒व । भव॑ति । अ॒धिदे॒वन॑ इ॒त्यधि॑ - दे॒वने॑ । जु॒होति॑ । अ॒धिदे॒वन॑
इ॒त्यधि॑ - दे॒वने॑ । ए॒व । अ॒स्मै । स॒जा॒ता॒नि॒ति स-जा॑तान् । अ॒वेति॑ ।
रु॒न्धे । ते । ए॒नम् । अ॒वरु॑द्धा इ॒त्यव॑ - रु॒द्धाः । उ॒पेति॑ । ति॒ष्ठन्ते॑ ।
रथ॑मु॒ख इति॑ रथ - मु॒खे । ओ॒ज॒स्का॒म॒स्येत्यो॑जः - का॒म॒स्य ।
हो॒तव्याः॑ । ओ॒जः । वै । रा॒ष्ट्र॒भू॒त इति॑ रा॒ष्ट्र-भू॑तः । ओ॒जः । रथः॑ ।
ओ॒ज॒सा । ए॒व । अ॒स्मै । ओ॒जः । अ॒वेति॑ । रु॒न्धे । ओ॒ज॒स्वी ।
ए॒व । भव॑ति । यः । रा॒ष्ट्रात् । अ॒प॒भू॒त इत्य॑प - भू॒तः । स्या॑त् ।
तस्मै॑ । हो॒तव्याः॑ । याव॑न्तः । अ॒स्य । रथाः॑ । स्युः॑ । तान् । ब्रू॒यात् ।
यु॒ङ्ध्वम् । इति॑ । रा॒ष्ट्रम् । ए॒व । अ॒स्मै । यु॒नक्ति॑ । 23 (50)

TS 3.4.8.3

हु॒तयो॑ वा ए॒तस्या॑क्लृ॒प्ता यस्य॑ रा॒ष्ट्रं न क॑ल्पते स्वर॒थस्य॑ दक्षि॒णं
च॒क्रं प्र॑वृ॒ह्य ना॒डीम॑भि जुहु॒यादाहु॑तीरे॒वास्य॑ कल्पयति ता अ॒स्य

कल्प॑माना राष्ट्र॑मनु कल्प॑ते संग्रामे सँय॑त्ते होत॑व्या राष्ट्रं॑ वै
 राष्ट्र॑भृतो राष्ट्र॑े खलु॑ वा ए॒ते व्याय॑च्छन्ते ये सङ्ग्राम॑ञ् सँय॑न्ति
 यस्य॑ पूर्व॑स्य जुह॑ति स ए॒व भव॑ति जय॑ति तञ् संग्रामं॑ मान्धुक॑

इद्ध्मो- [] 24

TS 3.4.8.3 - Padam

आहु॑तय इत्या - हु॒तयः॑ । वै । ए॒तस्य॑ । अक्लृ॑प्ताः । यस्य॑ ।
 राष्ट्र॑म् । न । कल्प॑ते । स्वर॑थस्येति स्व - रथ॑स्य । दक्षि॑णम् ।
 चक्र॑म् । प्रवृ॑ह्येति प्र - वृ॒ह्य । ना॒डीम् । अ॒भीति॑ । जुहु॑यात् ।
 आहु॑तीरित्या - हु॒तीः । ए॒व । अ॒स्य । कल्प॑यति । ताः । अ॒स्य ।
 कल्प॑मानाः । राष्ट्र॑म् । अन्वि॑ति । कल्प॑ते । संग्राम॑ इति सं - ग्रामे॑ ।
 सँय॑त्त इति सं - य॒त्ते । होत॑व्याः । राष्ट्र॑म् । वै । राष्ट्र॑भृत इति
 राष्ट्र - भृतः॑ । राष्ट्र॑े । खलु॑ । वै । ए॒ते । व्याय॑च्छन्त इति
 वि - आय॑च्छन्ते । ये । संग्राम॑मिति सं - ग्राम॑म् । सँय॑न्तीति
 सं-य॑न्ति । यस्य॑ । पूर्व॑स्य । जुह॑ति । सः । ए॒व । भव॑ति । जय॑ति ।
 तम् । संग्राम॑मिति सं - ग्राम॑म् । मान्धुकः॑ । इद्ध्मः॑ । 24 (50)

TS 3.4.8.4

भवत्यङ्गारा ए॒व प्र॒ति॒वेष्ट॑माना अ॒मि॒त्रा॒णाम॒स्य से॒नां
प्र॒ति वेष्ट॑यन्ति॒ य उ॒न्माद्ये॑त् तस्मै॑ हो॒तव्या॑ ग॒न्ध॒र्वा॒प्सर॒सो वा
ए॒तमु॒न्माद॑यन्ति॒ य उ॒न्माद्य॑त्ये॒ते खलु॑ वै ग॒न्ध॒र्वा॒प्सर॒सो
यद्-राष्ट्र॑भृ॒तस्तस्मै॑ स्वाहा॒ ताभ्यः॑ स्वाहेति॒ जुहोति॑ तेनै॒वैनाञ्छ॑मयति॒
नैय॑ग्रो॒ध औ॒दु॒म्बर॑ आ॒श्वत्थः॑ प्लाक्ष॒ इती॒द्ध्मो भव॑त्ये॒ते वै
ग॒न्ध॒र्वा॒प्सर॒सां गृ॒हाः स्व॑ ए॒वैना॑ - [] 25

TS 3.4.8.4 - Padam

भव॑ति । अ॒ङ्गाराः॑ । ए॒व । प्र॒ति॒वेष्ट॑माना इति॑ प्र॒ति - वेष्ट॑मानाः ।
अ॒मि॒त्रा॒णाम् । अ॒स्य । से॒नाम् । प्र॒तीति॑ । वेष्ट॑यन्ति । यः ।
उ॒न्माद्ये॑दित्युत् - माद्ये॑त् । तस्मै॑ । हो॒तव्याः॑ । ग॒न्ध॒र्वा॒प्सर॒स इति॑
ग॒न्ध॒र्व - अ॒प्सर॒सः । वै । ए॒तम् । उ॒दिति॑ । मा॒दय॑न्ति । यः ।
उ॒न्माद्य॑तीत्युत् - माद्य॑ति । ए॒ते । खलु॑ । वै । ग॒न्ध॒र्वा॒प्सर॒स इति॑
ग॒न्ध॒र्व - अ॒प्सर॒सः । यत् । रा॒ष्ट्रभृ॑त इति॑ रा॒ष्ट्र - भृ॑तः । तस्मै॑ ।
स्वाहा॑ । ताभ्यः॑ । स्वाहा॑ । इति॑ । जुहोति॑ । तेन॑ । ए॒व । ए॒नान् ।
श॒मय॑ति । नैय॑ग्रो॒धः । औ॒दु॒म्बरः॑ । आ॒श्वत्थः॑ । प्लाक्षः॑ । इति॑ ।

इ॒ध्मः । भ॒व॒ति॒ । ए॒ते॒ । वै ।

ग॒न्ध॒र्वा॒प्स॒र॒सा॒मि॒ति॒ ग॒न्ध॒र्व – अ॒प्स॒र॒सा॒म् । गृ॒हाः ।

स्वे । ए॒व । ए॒ना॒न् । 25 (50)

TS 3.4.8.5

ना॒य॒त॒ने॒ श॒म॒य॒त्य॒भि॒च॒र॒ता॒ प्र॒ति॒लो॒म॒ꣳ हो॒त॒व्याः॑ प्रा॒णा॒ने॒वा॒स्य॑
प्र॒ती॒चः॑ प्र॒ति॒ यौ॒ति॒ तं॒ ततो॑ ये॒न॒ के॒न॒ च॒ स्तृ॒णु॒ते॒ स्व॒कृ॒त॒ इ॒रि॒णे॑
जु॒हो॒ति॒ प्र॒द॒रे॒ वै॒त॒द्-वा॒ अ॒स्यै॑ निर्॒ऋ॒ति॒गृ॒ही॒तं॒ निर्॒ऋ॒ति॒गृ॒ही॒त॒ ए॒वै॒नं॑
नि॒र्ऋ॒त्या॑ ग्रा॒ह॒य॒ति॒ य॒द्-वा॒चः॑ कू॒रं॒ ते॒न॒ व॒ष॒ट् क॒रो॒ति॒ वा॒च॒ ए॒वै॒नं॑
कू॒रे॒ण॒ प्र॒ वृ॒श्च॒ति॒ ता॒ज॒गा॒र्ति॒मा॒च्छ॒ति॒ यस्य॑ का॒म॒यै॒ता॒न्ना॒द्य – [] 26

TS 3.4.8.5 - Padam

आ॒य॒त॒न॒ इ॒त्या॑ – य॒त॒ने॒ । श॒म॒य॒ति॒ । अ॒भि॒च॒र॒ते॒त्य॒भि॒ – च॒र॒ता॒ ।
प्र॒ति॒लो॒म॒मि॒ति॒ प्र॒ति॒ – लो॒म॒म् । हो॒त॒व्याः॑ । प्रा॒णा॒नि॒ति॒ प्र॒ – अ॒ना॒न् ।
ए॒व । अ॒स्य॑ । प्र॒ती॒चः॑ । प्र॒ती॒ति॒ । यौ॒ति॒ । त॒म् । त॒तः॑ । ये॒न॑ । के॒न॑ ।
च॒ । स्तृ॒णु॒ते॒ । स्व॒कृ॒त॒ इ॒ति॒ स्व॒ – कृ॒ते॒ । इ॒रि॒णे॑ । जु॒हो॒ति॒ ।

प्र॒दर॑ इति॑ प्र – दरे॑ । वा॒ । ए॒तत् । वै । अ॒स्यै । निर्ऋ॑तिगृही॒तमि॒ति
 निर्ऋ॑ति – गृही॒तम् । निर्ऋ॑तिगृही॒त इति॑ निर्ऋ॑ति-गृही॒ते । ए॒व ।
 ए॒नम् । निर्ऋ॑त्येति॑ निः-ऋ॒त्या । ग्रा॒हय॑ति । यत् । वा॒चः । क्रू॒रम् ।
 तेन॑ । वष॑ट् । करो॑ति । वा॒चः । ए॒व । ए॒नम् । क्रू॒रेण॑ । प्रेति॑ ।
 वृ॒श्चति॑ । ता॒जक् । आ॒र्तिम् । ए॒ति । ऋ॒च्छति॑ । य॒स्य । का॒मये॑त ।
 अ॒न्नाद्य॑मित्य॒न्न – अद्य॑म् । 26 (50)

TS 3.4.8.6

मा द॑दीयेति॑ तस्य॑ स॒भाया॑मुत्ता॒नो नि॒पद्य॑ भुव॒नस्य॑ प॒त इति॑
 तृ॒णानि॑ सं गृ॒ह्णीयात्॑ प्र॒जाप॑तिर्वै भुव॒नस्य॑ प॒तिः
 प्र॒जाप॑तिनै॒वास्यान्नाद्य॑मा द॒त्त इ॒दम॒ह-म॒मुष्या॑ऽऽमुष्या॑यणस्यान्नाद्य॑
 ह॒रामी॑त्या॒हान्नाद्य॑मे॒वास्य॑ हरति॑ षड्भिर्ः । हरति॑ षड् वा ऋ॒तवः॑
 प्र॒जाप॑तिनै॒वास्या-न्नाद्य॑-मा॒दाय॑र्तवोऽस्मा॒ अनु॑ प्र य॑च्छन्ति – [] 27

TS 3.4.8.6 - Padam

ए॒ति । द॑दीय॒ । इति॑ । तस्य॑ । स॒भाया॑म् । उ॒त्ता॒न इत्यु॑त् – ता॒नः ।
 नि॒पद्ये॑ति नि – प॒द्य । भुव॑नस्य । प॒ते । इति॑ । तृ॒णानि॑ । स॒मिति॑ ।
 गृ॒ह्णीयात्॑ । प्र॒जाप॑तिरिति॑ प्र॒जा – प॒तिः । वै । भुव॑नस्य । प॒तिः ।

प्र॒जाप॑ति॒नेति॑ प्र॒जा – प॒तिना॑ । ए॒व । अ॒स्य॒ ।
 अ॒न्नाद्य॑मि॒त्यन्न॑ – अ॒द्यम् । ए॒ति । द॒त्ते । इ॒दम् । अ॒हम् । अ॒मुष्य॑ ।
 आ॒मुष्या॑यण॒स्य । अ॒न्नाद्य॑मि॒त्यन्न॑ – अ॒द्यम् । ह॒रामि॑ । इ॒ति । आ॒ह ।
 अ॒न्नाद्य॑मि॒त्यन्न॑ – अ॒द्यम् । ए॒व । अ॒स्य॒ । ह॒रति॑ ।
 ष॒ड्भि॑रिति॑ षट् – भिः । ह॒रति॑ । षट् । वै । ऋ॒तवः॑ ।
 प्र॒जाप॑ति॒नेति॑ प्र॒जा-प॒तिना॑ । ए॒व । अ॒स्य॒ । अ॒न्नाद्य॑मि॒त्यन्न॑ – अ॒द्यम् ।
 आ॒दाये॒त्या-दा॑य । ऋ॒तवः॑ । अ॒स्मै । अ॒नु । प्रे॒ति ।

यच्छन्ति । 27 (50)

TS 3.4.8.7

यो ज्येष्ठ॑बन्धु-रप॑भूतः स्यात् त॒स्थले॑ऽवसा॑य्य ब्र॒ह्मौदनं॑ चतु॑श्शरा॒वं
 प॒क्त्वा तस्मै॑ होत॒व्या वर्ष॑म् वै रा॒ष्ट्रभृ॑तो वर्ष॑म् स्थ॒लं 'वर्ष॑णै॒वैनं॑ 'वर्ष॑
 स॒माना॑नां गमयति॑ चतु॑श्शरा॒वो भव॑ति दि॒क्ष्वेव॑ प्रति॑ तिष्ठति॑ क्षी॒रे
 भव॑ति रुच॑मे॒वास्मिन्॑ दधा॒त्युद्ध॑रति॑ शृ॒त॒त्वाय॑ सर्पि॒ष्वान् भव॑ति
 मेद्ध्य॑त्वाय॑ च॒त्वार आ॒र्षेयाः॑ प्रा॒श्नन्ति॑ दि॒शामे॒व ज्योति॑षि
 जुहोति ॥ 28

TS 3.4.8.7 - Padam

यः । ज्येष्ठ॑बन्धु॑रिति ज्येष्ठ॑ – बन्धुः॑ । अप॑भूत॑ इत्यप॑ – भूतः॑ ।
स्यात् । तम् । स्थल॑ । अव॑साय्येत्यव॑ – साय्य॑ । ब्रह्म॑द॒नमि॑ति
ब्रह्म॑ – ओ॒दनम् । चतु॑श्शराव॑मिति चतुः॑ – शराव॑म् । पक्त्वा ।
तस्मै॑ । हो॒तव्याः॑ । वर्ष॑म् । वै । राष्ट्र॑भूत॑ इति राष्ट्र॑ – भूतः॑ । वर्ष॑म् ।
स्थल॑म् । वर्ष॑म्णा । ए॒व । ए॒नम् । वर्ष॑म् । स॒मा॒ना॒नाम् । ग॒म॒य॒ति ।
चतु॑श्शराव॑ इति चतुः॑ – शरावः॑ । भ॒व॒ति । दि॒क्षु । ए॒व । प्र॒ती॒ति ।
तिष्ठ॑ति । क्षी॒रे । भ॒व॒ति । रुच॑म् । ए॒व । अ॒स्मिन् । द॒धा॒ति । उ॒दि॒ति ।
ह॒र॒ति । शृ॒त॒त्वा॒ये॒ति शृ॒त – त्वा॒य । सर्पि॑ष्वान् । भ॒व॒ति ।
मे॒द्ध्य॒त्वा॒ये॒ति मे॒द्ध्य॒-त्वा॒य । च॒त्वा॒रः । आ॒र्षे॒याः । प्रे॒ति ।
अ॒श्न॒न्ति । दि॒शाम् । ए॒व । ज्यो॑तिषि । जु॒हो॒ति ॥ 28 (49)

(ग्रामी॑ – यु॒न॒क्ती – ध॒मः – स्व॑ ए॒वैना॑ – न॒न्नाद्यं॑ – यँ॒च्छ॒न्त्ये –
का॒न्न॒पञ्चा॑श॒च्च) (A8)

TS 3.4.9.1

दे॒वि॒का निर्व॑पेत् प्र॒जाका॑म॒ इच्छ॑न्दा॒ऽसि॒ वै दे॒वि॒का इच्छ॑न्दा॒ऽसी॒व
खलु॑ वै प्र॒जाइच्छ॑न्दो॒भिरे॒वास्मै॑ प्र॒जाः प्र॒ जन॑यति प्रथ॒मं धा॑तारं
करो॑ति मि॒थुनी॑ ए॒व तेन॑ करो॒त्यन्वे॒वास्मा॑ अनु॒मति॑र्मन्यते रा॒ते रा॒का
प्र॒ सिनी॑वा॒ली जन॑यति प्र॒जास्वे॒व प्रजा॑तासु कु॒ह्वा वाचं॑ दधा॒त्येता॑ ए॒व
निर्व॑पेत् प॒शुका॑म॒ इच्छ॑न्दा॒ऽसि॒ वै दे॒वि॒का इच्छ॑न्दा॒ऽसी – [] 29

TS 3.4.9.1 - Padam

दे॒वि॒काः । निरि॑ति । व॒पेत् । प्र॒जाका॑म॒ इति॑ प्र॒जा – का॒मः ।
छन्दा॑ऽसि । वै । दे॒वि॒काः । छन्दा॑ऽसि । इ॒व । खलु॑ । वै ।
प्र॒जा इति॑ प्र-जाः । छन्दा॑भिरिति छन्दः – भिः । ए॒व । अ॒स्मै ।
प्र॒जा इति॑ प्र-जाः । प्रेति॑ । जन॑यति । प्रथ॒मम् । धा॑तारम् । करो॑ति ।
मि॒थुनी॑ । ए॒व । तेन॑ । करो॑ति । अ॒न्विति॑ । ए॒व । अ॒स्मै ।
अनु॑मतिरित्यनु – म॒तिः । म॒न्यते॑ । रा॒ते । रा॒का । प्रेति॑ । सिनी॑वा॒ली ।
जन॑यति । प्र॒जास्वि॑ति प्र – जा॒सु । ए॒व । प्रजा॑तास्वि॒ति
प्र – जा॒तासु॑ । कु॒ह्वा । वाच॑म् । दधा॑ति । ए॒ताः । ए॒व । निरि॑ति ।

व॒पेत् । प॒शु॒का॒म॒ इति॑ प॒शु – का॒मः । छ॒न्दा॒ँसि॑ । वै । दे॒वि॒काः ।
छ॒न्दा॒ँसि॑ । 29 (50)

TS 3.4.9.2

व॒ खलु॑ वै प॒शव॑ इ॒च्छन्द्वा॑भि॒-रे॒वास्मै॑ प॒शून् प्र॑ ज॒नय॑ति प्रथ॒मं धा॒तारं॑
क॒रोति॑ प्रै॒व तेन॑ वा॒पय॑त्यन्वे॒वास्मा॑ अनु॒मति॑र्मन्यते रा॒ते रा॒का प्र॑
सि॒नीवा॒ली ज॒नय॑ति प॒शून् ए॒व प्र॒जा॒ता॒न् कु॒ह्वा॑ प्र॒ति ष्ठा॒पय॑त्ये॒ता ए॒व
नि॒र्व॒पेद्-ग्रा॒म॒का॒म॒इ॒च्छन्दा॑ँसि॒ वै दे॒वि॒का इ॒च्छन्दा॑ँसी व॒ खलु॑ वै
ग्रा॒म इ॒च्छन्द्वा॑भि॒-रे॒वास्मै॑ ग्रा॒म – [] 30

TS 3.4.9.2 - Padam

इ॒व । खलु॑ । वै । प॒शवः॑ । छ॒न्द्वा॑भि॒रिति॑ छ॒न्दः – भिः॑ । ए॒व ।
अ॒स्मै । प॒शून् । प्रेति॑ । ज॒नय॑ति । प्रथ॒मम् । धा॒तारम् । क॒रोति॑ ।
प्रेति॑ । ए॒व । तेन॑ । वा॒पय॑ति । अ॒न्विति॑ । ए॒व । अ॒स्मै ।
अनु॒मति॑रित्यनु॒ – म॒तिः । म॒न्यते॑ । रा॒ते । रा॒का । प्रेति॑ । सि॒नीवा॒ली ।
ज॒नय॑ति । प॒शून् । ए॒व । प्र॒जा॒ता॒निति॑ प्र-जा॒ता॒न् । कु॒ह्वा॑ । प्र॒तीति॑ ।
स्था॒पय॑ति । ए॒ताः । ए॒व । नि॒रिति॑ । व॒पेत् । ग्रा॒म॒का॒म॒ इति॑
ग्रा॒म – का॒मः । छ॒न्दा॑ँसि॒ वै । दे॒वि॒काः । छ॒न्दा॑ँसि॒ इ॒व ।

खलु॑ । वै॑ । ग्रामः॑ । छन्दो॑भिरिति॒ छन्दः॑ – भिः॑ । ए॒व । अ॒स्मै॑ ।

॥
ग्रामम् । 30 (50)

TS 3.4.9.3

म॒व रु॒न्धे म॒द्ध्यतो॑ धा॒तारं॑ करोति म॒द्ध्यत॑ ए॒वैनं॑ ग्राम॒स्य दधा॑त्येता
ए॒व निर्व॑पेज्ज्यो॒गामया॑वी छन्दा॑सि॒ वै दे॒विका॑ ऋछन्दा॑सि॒ खलु॑ वा
ए॒तम॑भि म॒न्यन्ते॑ यस्य॒ ज्यो॒गामय॑ति॒ छन्दो॑भि-रे॒वैन॑म॒गदं॑ करोति
म॒द्ध्यतो॑ धा॒तारं॑ करोति म॒द्ध्यतो॑ वा ए॒तस्याक्लृ॑प्तं॒ यस्य॑
ज्यो॒गामय॑ति म॒द्ध्यत॑ ए॒वास्य॑ तेन॒ कल्प॑यत्येता ए॒व निर् – [] 31

TS 3.4.9.3 - Padam

अ॒वेति॑ । रु॒न्धे । म॒द्ध्यतः॑ । धा॒तारम् । क॒रोति॑ । म॒द्ध्यतः॑ । ए॒व ।
ए॒नम् । ग्राम॒स्य । द॒धाति॑ । ए॒ताः । ए॒व । नि॒रिति॑ । व॒पेत् ।
ज्यो॒गामया॑वीति॒ ज्योक् – आ॒मया॑वी । छन्दा॑सि॒ वै । दे॒विकाः॑ ।
छन्दा॑सि॒ खलु॑ । वै । ए॒तम् । अ॒भीति॑ । म॒न्यन्ते॑ । यस्य॑ ।
ज्योक् । आ॒मय॑ति । छन्दो॑भिरिति॒ छन्दः॑ – भिः॑ । ए॒व । ए॒नम् ।
अ॒गदम् । क॒रोति॑ । म॒द्ध्यतः॑ । धा॒तारम् । क॒रोति॑ । म॒द्ध्यतः॑ । वै ।

ए॒तस्य॑ । अ॒क्लृ॒प्तम् । यस्य॑ । ज्योक् । आ॒मय॑ति । म॒द्ध्य॒तः । ए॒व ।
अ॒स्य । ते॒न । क॒ल्प॒यति॑ । ए॒ताः । ए॒व । नि॒रिति॑ । 31 (50)

TS 3.4.9.4

व॒पेद्-यं॑ य॒ज्ञो नो॒पन॑मे॒च्छन्दा॑सि॒ वै दे॒विका॑ ऋ॒च्छन्दा॑सि॒ खलु॑
वा ए॒तं नो॒प न॑मन्ति॒ यं य॒ज्ञो नो॒पन॑मति॒ प्रथ॑मं॒ धा॒तारं॑ करोति
मु॒खत॑ ए॒वास्मै॑ छन्दा॑सि॒ दधा॑त्यु॒पैनं॑ य॒ज्ञो न॑मत्ये॒ता ए॒व
निर्व॑पेदी॒जान॑ ऋ॒च्छन्दा॑सि॒ वै दे॒विका॑ या॒तया॑मानी॒व खलु॑ वा
ए॒तस्य॑ छन्दा॑सि॒ य ई॒जान॑ उ॒त्तमं॑ धा॒तारं॑ करो – [] 32

TS 3.4.9.4 - Padam

व॒पेत् । यम् । य॒ज्ञः । न । उ॒पन॑मे॒दित्यु॑प – न॒मेत् । छन्दा॑सि॒ वै ।
दे॒विकाः॑ । छन्दा॑सि॒ खलु॑ । वै । ए॒तम् । न । उ॒पेति॑ । न॒मन्ति॑ ।
यम् । य॒ज्ञः । न । उ॒पन॑मतीत्यु॑प – न॒मति॑ । प्र॒थम॑म् । धा॒तार॑म् ।
क॒रोति॑ । मु॒खतः॑ । ए॒व । अ॒स्मै । छन्दा॑सि॒ दधा॑ति । उ॒पेति॑ ।
ए॒नम् । य॒ज्ञः । न॒मति॑ । ए॒ताः । ए॒व । नि॒रिति॑ । व॒पेत् । ई॒जानः॑ ।
छन्दा॑सि॒ वै । दे॒विकाः॑ । या॒तया॑मानी॒ति या॒त – या॒मानि॑ । इ॒व ।

खलु॑ । वै । ए॒तस्य॑ । छ॒न्दा॑सि । यः । ई॒जानः॑ ।

उ॒त्त॒म॒मि॒त्यु॒त् – त॒मम् । धा॒तार॑म् । क॒रो॒ति॑ । 32 (50)

TS 3.4.9.5

–त्यु॒परि॑ष्ठादे॒वास्मै॑ छ॒न्दा॑स्यया॒तया॑मा॒न्यव॑ रु॒न्ध उपै॑नमु॒त्तरो॑
य॒ज्ञो न॑म॒त्येता॑ ए॒व निर्व॑पेद्–यं मे॒धा नो॒पन॑मे॒च्छन्दा॑सि वै
दे॒विका॑श्छ॒न्दा॑सि खलु॑ वा ए॒तं नो॒प न॑म॒न्ति यं मे॒धा नो॒पन॑म॒ति
प्र॒थमं॑ धा॒तारं॑ क॒रो॒ति मु॒खत॑ ए॒वास्मै॑ छ॒न्दा॑सि द॒धात्यु॑पै॒नं
मे॒धा न॑म॒त्येता॑ ए॒व निर्व॑पेद् – [] 33

TS 3.4.9.5 - Padam

उ॒परि॑ष्ठात् । ए॒व । अ॒स्मै । छ॒न्दा॑सि ।

अ॒या॒तया॑मा॒नीत्य॑या॒त – या॒मा॒नि । अ॒वे॒ति॑ । रु॒न्धे । उ॒पे॒ति॑ । ए॒नम् ।

उ॒त्तर॑ इ॒त्यु॒त् – त॒रः । य॒ज्ञः । न॒म॒ति॑ । ए॒ताः । ए॒व । नि॒रि॒ति॑ । व॒पे॒त् ।

यम् । मे॒धा । न । उ॒प॒न॑मे॒दित्यु॑प – न॒मे॒त् । छ॒न्दा॑सि । वै ।

दे॒विकाः॑ । छ॒न्दा॑सि । खलु॑ । वै । ए॒तम् । न । उ॒पे॒ति॑ । न॒म॒न्ति॑ ।

यम् । मे॒धा । न । उ॒प॒न॑म॒तीत्यु॑प – न॒म॒ति॑ । प्र॒थ॒मम् । धा॒तार॑म् ।

क॒रोति॑ । मु॒खतः॑ । ए॒व । अ॒स्मै । छ॒न्दा॑ँ॒सि । द॒धाति॑ । उ॒पेति॑ ।
ए॒नम् । मे॒धा । न॒मति॑ । ए॒ताः । ए॒व । नि॒रिति॑ । व॒पेत् । 33 (50)

TS 3.4.9.6

रुक्काम॑ इ॒छन्दा॑ँ॒सि वै दे॒विका॑ इ॒छन्दा॑ँ॒सीव॑ ख॒लु वै रुक्
छ॒न्दो॑भि॒रेवा॒स्मिन् रुचं॑ द॒धाति॑क्षी॒रे भ॑वन्ति रुच॑मे॒वास्मिन् द॑धति
म॒द्ध्यतो॑ धा॒तारं॑ करोति म॒द्ध्यत॑ ए॒वैन॑ँ॒ रुचो॑ द॒धाति॑गाय॒त्री वा
अ॒नुम॑तिस्त्रि॒ष्टुग्-रा॒का ज॑गती सिनीवा॒ल्यनु॑ष्टुप् कु॒हूर्द्धा॒ता व॑षट्कारः
॥ पूर्॒वप॒क्षो रा॒काऽप॑रपक्षः कु॒हूर॑मावा॒स्या सि॒नीवा॒ली
॥ पौ॒र्णमा॑-स्यनु॒मति॑-श्च॒न्द्रमा॑ धा॒ताऽष्टौ॑ - [] 34

TS 3.4.9.6 - Padam

रुक्काम॑ इति रुक्-कामः । छ॒न्दा॑ँ॒सि । वै । दे॒विकाः॑ । छ॒न्दा॑ँ॒सि ।
इ॒व । ख॒लु । वै । रुक् । छ॒न्दो॑भि॒रिति॑ छ॒न्दः-भिः॑ । ए॒व ।
अ॒स्मिन् । रुच॑म् । द॒धाति॑ । क्षी॒रे । भ॑वन्ति । रुच॑म् । ए॒व ।
अ॒स्मिन् । द॑धति । म॒द्ध्यतः॑ । धा॒तारम् । क॒रोति॑ । म॒द्ध्यतः॑ । ए॒व ।
ए॒नम् । रुचः॑ । द॒धाति॑ । गा॒यत्री॑ । वै । अ॒नुम॑तिरित्यनु - म॒तिः ।
त्रि॒ष्टुक् । रा॒का । ज॑गती । सि॒नीवा॒ली । अ॒नुष्टु॑बित्यनु - स्तुप् ।

कु॒हूः । धा॒ता । व॒षट्कार॑ इति॑ व॒षट् – का॒रः ।

पूर्व॑पक्ष इति॑ पूर्॒व – पक्षः॑ । रा॒का । अ॒पर॒पक्ष॑ इत्य॑पर – पक्षः॑ ।

कु॒हूः । अ॒मा॒वा॒स्ये॒त्य॒मा – वा॒स्या॑ ॥ सि॒नी॒वा॒ली ।

पौ॒र्ण॒मा॒सी॒ति पौ॒र्ण – मा॒सी । अ॒नु॒म॒ति॒रि॒त्य॒नु – म॒तिः ।

॥
च॒न्द्र॒माः । धा॒ता । अ॒ष्टौ । 34 (50)

TS 3.4.9.7

व॒स॒वोऽष्टा॑क्ष॒रा गाय॑त्र्येका॒दश॑ रु॒द्रा ए॒का॒द॒शाक्ष॑रा त्रि॒ष्टुब्
द्वा॒द॒शाऽऽदि॑त्या द्वा॒द॒शाक्ष॑रा ज॒गती॑ प्र॒जाप॑तिर॒नु॒ष्टुब् धा॒ता व॒षट्कार॑
ए॒तद्-वै दे॒विकाः॑ सर्वा॑णि च॒ छन्दा॑ऽसि॒ सर्वा॑श्च दे॒वता॑ व॒षट्कार॑स्ता
यथ् स॒ह सर्वा॑ निर्व॑पेदी॒श्वरा॑ ए॒नं प्र॒द॒हो द्वे॑ प्र॒थ॒मे नि॒रुप्य॑ धा॒तुस्तृ॑तीयं
निर्व॑पेत् तथो॑ ए॒वोत्त॑रे निर्व॑पेत् तथै॒नं न प्र॑ द॒हन्त्य॑ () थो॒ यस्मै॑
का॒माय॑ नि॒रुप्य॑न्ते तमे॒वाऽऽभि॑-रु॒पाऽऽप्नो॑ति ॥ 35

TS 3.4.9.7 - Padam

व॒स॒वः । अ॒ष्टाक्ष॑रेत्य॒ष्टा – अ॒क्षरा॑ । गा॒य॒त्री । ए॒का॒द॒श । रु॒द्राः ।

ए॒का॒द॒शाक्ष॑रेत्येका॒दश॑ – अ॒क्षरा॑ । त्रि॒ष्टुप् । द्वा॒द॒श । आ॒दि॒त्याः ।

द्वाद॑शाक्ष॑रेति॒ द्वाद॑श-अ॒क्षरा॑ । जग॑ती । प्र॒जाप॑तिरिति॒ प्र॒जा – प॒तिः ।
 अनु॑ष्टुबि॒त्यनु॑-स्तुप् । धा॒ता । व॒षट्कार॑ इति॒ वषट् – का॒रः । ए॒तत् ।
 वै । दे॒वि॒काः । सर्वा॑णि । च । छ॒न्दा॒सि॑ । सर्वाः॑ । च । दे॒वताः॑ ।
 व॒षट्कार॑ इति॒ वषट् – का॒रः । ताः । यत् । स॒ह । सर्वाः॑ ।
 निर्व॑पेदिति॒ निः – व॒पेत् । ई॒श्वराः॑ । ए॒नम् । प्र॒द॒ह इति॒ प्र – द॒हः ।
 द्वे इति॑ । प्र॒थ॒मे इति॑ । नि॒रुप्ये॑ति॒ निः – उ॒प्य । धा॒तुः । तृ॒तीय॑म् ।
 निरि॑ति । व॒पेत् । तथो॑ इति॒ ए॒व । उ॒त्त॒रे इत्यु॑त् – त॒रे । निरि॑ति ।
 व॒पेत् । तथा॑ । ए॒नम् । न । प्रेति॑ । द॒हन्ति॑ () । अथो॑ इति॒ यस्मै॑ ।
 कामा॑य । नि॒रुप्यन्त॑ इति॒ निः – उ॒प्यन्ते॑ । तम् । ए॒व । आ॒भिः ।
 उपेति॑ । आप्नोति॑ ॥ 35 (59) (प॒शुका॑म॒श्छन्दा॑सि॒ वै दे॒वि॒का
 श्छन्दा॑सि-ग्रा॒मं-क॒ल्पय॑त्ये॒ता ए॒व नि-रु॑त्त॒मन्था॑तारं॒ करोति॑ –
 मे॒धा न॑मत्ये॒ता ए॒व निर्व॑पे – द॒ष्टौ – द॒हन्ति॑ – न॒व च॑) (A9)

Special Korvai:

(दे॒विकाः प्र॒जाका॑मो मि॒थुनी॑ प॒शुका॑मः प्रै॒व ग्रा॑म॒कामो॑ ज्यो॒गा॒मया॑वी
यं य॑ज्ञो य ई॒जानो॑ यं मे॒धा रु॑क्का॒मोऽष्टौ॑ ।

दे॒विका॑ भवन्ति दधति रा॒ष्ट्रका॑माय भवति दधाति ।)

TS 3.4.10.1

वास्तो॑ष्पते॒ प्रति॑ जानी॒ह्यस्मान्त् स्वा॑वेशो॒ अन॑मीवो **भ॒वा** नः ।

यत् त्वे॑महे॒ प्रति॑ तन्नो॒ जुष॑स्व शन्न ए॒धि द्वि॑पदे शञ्चतु॒ष्पदे॑ ॥

वास्तो॑ष्पते शग्मया स॒सदा॑ ते सक्षी॒महि॑ रण्वया॒ गातु॑मत्या ।

आ॒वः क्षे॑म उ॒त यो॒गे वर॑न्नो यू॒यं पा॑त स्व॒स्तिभिः॑ सदा॒ नः ॥

यथ् सा॒यंप्रा॑तर॒ग्निहो॑त्रं जु॒होत्या॑हुती॒ष्टका॑ ए॒व ता॑ उप

धत्ते – [] 36

TS 3.4.10.1 - Padam

वास्तो॑ः । प॒ते । प्र॒तीति॑ । जा॒नी॒हि । अ॒स्मान् । स्वा॑वेश इति

सु-आ॑वेशः । अ॒न॒मी॒वः । भ॒व । नः ॥ यत् । त्वा । ई॒महे॑ । प्र॒तीति॑ ।

तत् । नः । जु॒ष॒स्व । शम् । नः । ए॒धि । द्वि॒पद॑ इति द्वि – पदे॑ ।

शम् । चतुष्पद इति चतुः – पदे ॥ वास्तौः । पते । शग्मया ।
स॒सदेति॑ सं – सदा॑ । ते । सक्षीमहि॑ । रण्वया॑ । गातुमत्येति॑
गातु – मत्या॑ ॥ आवः॑ । क्षेमै॑ । उत । योगै॑ । वरम् । नः ।
यूयम् । पात । स्वस्तिभिरिति॑ स्वस्ति – भिः । सदा॑ । नः ॥ यत् ।
सायंप्रातरिति॑ सायं – प्रातः । अग्निहोत्रमित्यग्नि – होत्रम् ।
जुहोति॑ । आहुतीष्टका॑ इत्याहुति – इष्टकाः । एव । ताः । उपेति॑ ।

धत्ते । 36 (50)

TS 3.4.10.2

यजमानोऽहोरात्राणि॑ वा एतस्येष्टका॑ य आहिताग्निर्यथ॑
सायंप्रातर् जुहोत्यहोरात्राण्येवाऽऽप्त्वेष्टकाः॑ कृत्वोप धत्ते दश॑
समानत्र जुहोति॑ दशाक्षरा॑ विराड् विराजमेवाऽऽप्त्वेष्टकां॑ कृत्वोप
धत्ते ऽथो विराज्येव॑ यज्ञमाप्नोति॑ चित्यश्चित्यो ऽस्य भवति॑ तस्माद्
यत्र दशोषित्वा॑ प्रयाति॑ तद्-यज्ञवास्त्ववास्त्वेव॑ तद् यत्
ततोऽर्वाचीनं॑ – [] 37

TS 3.4.10.2 - Padam

यज॑मानः । अ॒हो॒रा॒त्राणी॑त्यहः-रा॒त्राणि॑ । वै । ए॒तस्य॑ । इ॒ष्टकाः॑ । यः ।
आ॒हि॒ता॒ग्नि॒रित्या॑हित - अ॒ग्निः । यत् । सा॒यंप्रा॑तरिति सा॒यं-प्रा॑तः ।
जु॒होति॑ । अ॒हो॒रा॒त्राणी॑त्यहः - रा॒त्राणि॑ । ए॒व । आ॒प्त्वा । इ॒ष्टकाः॑ ।
कृ॒त्वा । उपे॑ति । ध॒त्ते । द॒श । स॒मा॒न॒त्र । जु॒होति॑ । द॒शाक्ष॑रेति
द॒श - अ॒क्षरा॑ । वि॒राडिति॑ वि - राट् । वि॒राज॑मिति वि - रा॒जम् ।
ए॒व । आ॒प्त्वा । इ॒ष्टका॑म् । कृ॒त्वा । उपे॑ति । ध॒त्ते । अथो॑ इति ।
वि॒राजी॑ति वि - रा॒जि । ए॒व । य॒ज्ञम् । आ॒प्नो॑ति ।
चि॒त्यश्चि॑त्य इति चि॒त्यः - चि॒त्यः । अ॒स्य । भ॒वति॑ । तस्मा॑त् ।
यत्र॑ । द॒श । उ॒षित्वा॑ । प्र॒याती॑ति प्र - या॒ति । तत् ।
य॒ज्ञवा॑स्त्विति य॒ज्ञ-वा॑स्तु । अ॒वा॒स्तु । ए॒व । तत् । यत् । ततः॑ ।
अ॒र्वाची॑नम् । 37 (50)

TS 3.4.10.3

रु॒द्रः खलु॑ वै वा॒स्तोष्प॑तिर्यद॒हु॒त्वा वा॒स्तोष्प॑तीयं प्र॒याया॑द् रु॒द्र ए॒नं
भू॒त्वाऽग्नि॑रनू॒त्थाय॑ ह॒न्याद् वा॒स्तोष्प॑तीयं जु॒होति॑ भा॒ग॒धेये॑नै॒वैन॑

शमयति॑ नाऽऽ॑र्ति॒माच्छति॑ यज॒मानो॑ यद् यु॒क्ते जुहु॑याद्यथा॒ प्रया॑ते
वास्ता॒वाहु॑तिं जु॒होति॑ तादृ॒गेव॑ तद् यदयु॑क्ते जुहु॒याद् यथा॒ क्षेम॑
आहु॑तिं जु॒होति॑ तादृ॒गेव॑ तदहु॑तमस्य वास्तोष्प॒तीयः॑ स्या - [] 38

TS 3.4.10.3 - Padam

रुद्रः॑ । खलु॑ । वै । वास्तोष्प॒तिरिति॑ वास्तोः-पतिः॑ । यत् । अहु॑त्वा ।
वास्तोष्प॒तीयमिति॑ वास्तोः - प॒तीयम् । प्रया॒यादिति॑ प्र - या॒यात् ।
रुद्रः॑ । ए॒नम् । भू॒त्वा । अ॒ग्निः । अ॒नू॒त्थायेत्यनु॑ - उ॒त्थाय॑ । ह॒न्यात् ।
वास्तोष्प॒तीयमिति॑ वास्तोः - प॒तीयम् । जु॒होति॑ ।
भा॒ग॒धेये॒नेति॑ भा॒ग - धेये॑न । ए॒व । ए॒नम् । शम॑यति । न । आ॒र्तिम् ।
ए॒ति । ऋ॒च्छति॑ । यज॒मानः॑ । यत् । यु॒क्ते । जुहु॑यात् । यथा॑ ।
प्रया॑त इति प्र - या॒ते । वास्तौ॑ । आहु॑तिमि॒त्या-हु॑तिम् । जु॒होति॑ ।
तादृ॑क् । ए॒व । तत् । यत् । अयु॑क्ते । जुहु॑यात् । यथा॑ । क्षे॒मे ।
आहु॑तिमि॒त्या - हु॑तिम् । जु॒होति॑ । तादृ॑क् । ए॒व । तत् । अहु॑तम् ।
अ॒स्य । वास्तोष्प॒तीयमिति॑ वास्तोः - प॒तीयम् । स्या॒त् । 38 (50)

TS 3.4.10.4

दक्षि॑णो यु॒क्तो भव॑ति स॒व्योऽयु॒क्तोऽथ॑ वास्तोष्प॒तीयं जु॑होत्यु॒भयमे॒वा-
कर॑परि॒वर्गमे॒वैनं॑ श॒मय॑ति यदे॒कया जु॑हुयाद् दर्वि॒होमं॑ कुर्यात्
पुरो॑नुवा॒क्या म॒नूच्य॑ या॒ज्यया जु॑होति सदे॒वत्वाय॑ यद्भु॒त आ॒दद्ध्याद्
रु॒द्रं गृ॒हान॒न्वारो॑हयेद्-यद॒वक्षा॒णान्य॑संप्र॒क्षाय॑ प्रयायाद् यथा
यज्ञ॑वेश॒सं वाऽऽद॑हनं वा तादृ॒गेव॑ तद॒यन्ते॒ योनि॑र्ऋ॒त्विय॒ इत्य॑रण्योः
समा॑रोहय - [] 39

TS 3.4.10.4 - Padam

दक्षि॑णः । यु॒क्तः । भव॑ति । स॒व्यः । अ॒युक्तः । अथ॑ ।
वास्तोष्प॒तीयमि॑ति वास्तोः -प॒तीयम् । जु॑होति । उ॒भयम् । ए॒व ।
अ॒कः । अ॒परि॒वर्गमि॑त्यपरि - वर्गम् । ए॒व । ए॒नम् । श॒मय॑ति । यत् ।
ए॒कया॑ । जु॑हुयात् । दर्वि॒होममि॑ति दर्वि - होमम् । कुर्यात् ।
पुरो॑नुवा॒क्यामि॑ति पुरः - अ॒नुवा॒क्याम् । अ॒नूच्ये॑त्यनु - उ॒च्य ।
या॒ज्यया॑ । जु॑होति । सदे॒वत्वाये॑ति सदेव - त्वाय॑ । यत् । हु॒ते ।
आ॒दद्ध्यादि॑त्या - द॒द्ध्यात् । रु॒द्रम् । गृ॒हान् ।

अ॒न्वारो॑ह॒येदि॒त्यनु॑ – आ॒रोह॑येत् । यत् ।

अ॒व॒क्षा॒णा॒नी॒त्यव॑ – क्षा॒णानि॑ । अ॒संप्र॑क्षा॒प्येत्य॑सं – प्र॒क्षा॒प्य ।

प्र॒या॒यादि॑ति प्र – या॒यात् । यथा॑ । य॒ज्ञ॒वे॒शस॑मि॒ति य॒ज्ञ – वे॒शस॑म् ।

वा । आ॒द॒ह॒न॒मि॒त्या – द॒हन॑म् । वा । ता॒दृक् । ए॒व । तत् । अ॒यम् ।

ते । यो॒निः । ऋ॒त्वि॒यः । इति॑ । अ॒र॒ण्योः ।

स॒मा॒रो॒ह॒य॒तीति॑ सं – आ॒रो॒ह॒य॒ति । 39 (50)

TS 3.4.10.5

–त्येष॑ वा अ॒ग्ने॒र्यो॒निः स्व॑ ए॒वैनं॑ यो॒नौ स॒मा॒रो॒ह॒य॒त्यथो॑

ख॒ल्वाहु॑र्य॒द॒र॒ण्योः स॒मा॒रूढो॑ न॒श्येदु॑द॒स्याग्निः॑ सी॒देत् पुन॑रा॒धेयः॑

स्या॒दि॒ति या॑ ते अ॒ग्ने य॒ज्ञिया॑ त॒नूस्त॑ये॒ह्या रो॒हे॒त्या॒त्मन्त् स॒मा॒रो॒ह॒य॒ते

य॒ज॒मा॒नो वा॑ अ॒ग्ने॒र्यो॒निः स्वा॒यामे॑वैनं॑ यो॒न्यां स॒मा॒रो॒ह॒य॒ते ॥ 40

TS 3.4.10.5 - Padam

ए॒षः । वै । अ॒ग्नेः । यो॒निः । स्वे । ए॒व । ए॒नम् । यो॒नौ ।

स॒मा॒रो॒ह॒य॒तीति॑ सं–आ॒रो॒ह॒य॒ति । अथो॑ इति॑ । ख॒लु । आ॒हुः । यत् ।

अ॒र॒ण्योः । स॒मा॒रूढ॑ इति॑ सं–आ॒रूढः॑ । न॒श्येत् । उ॒दि॒ति । अ॒स्य ।

अ॒ग्निः । सी॒देत् । पुन॑रा॒धेय॑ इति॑ पुनः – आ॒धेयः॑ । स्या॒त् । इति॑ ।

या । ते । अग्ने । यज्ञिया॑ । तनूः॑ । तया॑ । एति॑ । इहि॑ । एति॑ । रोह॑ ।
 इति॑ । आ॒त्मन् । स॒मारो॑हयत॒ इति॑ सं-आ॒रोह॑यते । यज॑मानः । वै ।
 अग्नेः॑ । योनिः॑ । स्वा॒याम् । ए॒व । ए॒नम् । यो॒न्याम् । स॒मारो॑हयत॒
 इति॑ सं – आ॒रोह॑यते ॥ 40 (45) (ध॒त्ते- ऽर्वा॒चीन॑-स्याथ्-

स॒मारो॑हयति॒ -पञ्च॑चत्वारि॒ंशच्च॑) (A10)

TS 3.4.11.1

त्व-मग्ने॑ बृ॒हद् वयो॑ दधा॑सि दे॒व दा॒शुषे॑ ।
 क॒विर्गृ॑हपतिर्यु॒वा ॥
 ह॒व्यवा॑डग्नि-र॒जरः॑ पि॒ता नो॑ वि॒भुर्वि॒भावा॑ सु॒दृशी॑को अ॒स्मे ।
 सु॒गार्ह॒पत्याः॑ स॒मिषो॑ दि॒दीह्य॑स्मद्रि॒यख् सं मिमी॑हि श्र॒वाँसि॑ ॥
 त्वं च॑ सोम॑ नो व॒शो जी॒वातुं॑ न म॒रामहे॑ ।
 प्रि॒यस्तौ॑त्रो व॒नस्प॑तिः ॥
 ब्र॒ह्मा दे॒वानां॑ प॒दवीः॑ क॒वीना॑मृषिर्वि॒प्राणां॑ म॒हिषो॑ मृ॒गाणां॑ ।
 श्ये॒नो गृ॑द्वा॒णाँ स्व॑धि॒तिर् व॒नानाँ॑ सोमः॑ – [] 41

TS 3.4.11.1 - Padam

त्वम् । अ॒ग्ने । बृ॒हत् । वयः॑ । दधा॑सि । दे॒व । दा॒शुषे॑ ॥ क॒विः ।
गृ॒हप॑तिरिति गृ॒ह – प॒तिः । यु॒वा ॥ ह॒व्यवा॑डिति ह॒व्य – वाट् ।
अ॒ग्निः । अ॒जरः । पि॒ता । नः । वि॒भुरि॑ति वि – भुः । वि॒भावे॑ति
वि – भा॒वा ॥ सु॒दृशी॑क इति सु – दृ॒शीकः॑ । अ॒स्मे इति॑ ॥
सु॒गा॒र्हप॑त्या इति सु – गा॒र्हप॑त्याः । स॒मि॒ति । इ॒षः । दि॒दीहि॑ ।
अ॒स्मद्रि॑यगित्यस्म – द्रि॒यक् । स॒मि॒ति । मि॒मीहि॑ । श्र॒वा॒सि ॥
त्वम् । च । सो॒म । नः । व॒शः । जी॒वातु॑म् । न । म॒राम॑हे ॥
प्रि॒यस्तो॑त्र इति प्रि॒य – स्तो॑त्रः । व॒नस्प॑तिः ॥ ब्र॒ह्मा । दे॒वाना॑म् ।
प॒दवी॑रिति प॒द – वीः । क॒वीना॑म् । ऋ॒षिः । वि॒प्राणा॑म् । म॒हिषः॑ ।
मृ॒गाणा॑म् ॥ श्ये॒नः । गृ॒द्ध्राणा॑म् । स्व॒धि॒तिरि॑ति स्व – धि॒तिः ।
व॒नाना॑म् । सो॒मः । 41 (50)

TS 3.4.11.2

प॒वि॒त्रम॑त्येति रे॒भन् ॥
आ वि॒श्वदे॑वꣳ स॒त्प॒तिꣳ सू॒क्तैर॑द्या वृ॒णीम॑हे ।
स॒त्यस॑वꣳ स॒वि॒तारं॑ ॥

आस॒त्येन॑ रज॒सा वर्त॑मानो निवे॒शय॑न्नमृतं॒ मर्त्य॑ञ्च ।
 हिर॒ण्यये॑न सवि॒ता रथे॑नाऽऽ दे॒वो या॑ति भुव॒ना वि॒पश्य॑न् ॥
 यथा॑ नो अदि॒तिः कर॑त् पश्चे नृ॒भ्यो यथा॑ गवे॑ ।
 यथा॑ तोकाय॑ रुद्रि॒यं ॥
 मा न॑स्तो॒के तन॑ये मा न॒ आयु॑षि मा नो गो॒षु मा- [] 42

TS 3.4.11.2 - Padam

पवि॒त्रम् । अती॑ति । ए॒ति । रेभ॑न् ॥ ए॒ति । वि॒श्वदे॑वमि॒ति
 वि॒श्व - दे॒वम् । सत्प॑तिमि॒ति सत् - प॒तिम् । सू॒क्तैरि॑ति सु-उ॒क्तैः ।
 अद्य॑ । वृ॒णीम॑हे ॥ स॒त्यस॑वमि॒ति स॒त्य-स॑वम् । स॒विता॑रम् ॥ ए॒ति ।
 स॒त्येन॑ । रज॒सा । वर्त॑मानः । निवे॒शय॑न्निति नि-वे॒शय॑न् । अ॒मृत॑म् ।
 मर्त्य॑म् । च ॥ हि॒रण्य॑येन । स॒विता । रथे॑न । ए॒ति । दे॒वः । या॑ति ।
 भुव॒ना । वि॒पश्य॑न्निति वि-प॒श्य॑न् ॥ यथा॑ । नः । अदि॒तिः । कर॑त् ।
 पश्चे॑ । नृ॒भ्य इति॑ नृ - भ्यः । यथा॑ । गवे॑ ॥ यथा॑ । तोकाय॑ ।
 रुद्रि॒यम् ॥ मा । नः । तो॒के । तन॑ये । मा । नः । आयु॑षि । मा । नः ।
 गो॒षु । मा । 42 (50)

TS 3.4.11.3

नो अश्वेषु रीरिषः ।

वीरान् मा नो रुद्र भामितो वधीर् हविष्मन्तो नमसा विधेम ते ॥

उदप्रुतो न वयो रक्षमाणा वावदतो अभ्रियस्येव घोषाः ।

गिरिभ्रजो नोर्मयो मदन्तो बृहस्पतिमभ्यर्का अनावन् ॥

ह॒सैरिव सखिभिर्वावदद्भि-रश्मन्मयानि नहना व्यस्यन् ॥

बृहस्पति-रभिकनिक्रदद् गा उत प्रास्तौदुच्च विद्वा॑ अगायत् ॥

एन्द्र॑ सानसि॑ रयि॑ - [] 43

TS 3.4.11.3 - Padam

नः । अश्वेषु । रीरिषः ॥ वीरान् । मा । नः । रुद्र । भामितः । वधीः ।

हविष्मन्तः । नमसा । विधेम । ते ॥ उदप्रुत इत्युद - प्रुतः । न ।

वयः । रक्षमाणाः । वावदतः । अभ्रियस्य । इव । घोषाः ॥

गिरिभ्रज इति गिरि - भ्रजः । न । ऊर्मयः । मदन्तः । बृहस्पतिम् ।

अभीति । अर्काः । अनावन् ॥ ह॒सैः । इव । सखिभिरिति

सखि - भिः । वावदद्भिरिति वावदत् - भिः ।

अश्मन्मयानीत्यश्मन् - मयानि । नहना । व्यस्यन्निति वि-अस्यन् ॥

बृ॒ह॒स्प॒तिः॑ । अ॒भि॒क॒नि॒क्र॒द॒दि॒त्य॒भि॑ – क॒नि॒क्र॒द॒त् । गाः॑ । उ॒त । प्रे॒ति॑ ।
अ॒स्तौ॒त् । उ॒दि॒ति॑ । च॒ । वि॒द्वान् । अ॒गा॒य॒त् ॥ ए॒ति॑ । इ॒न्द्र॒ ।

सा॒न॒सि॒म् । रा॒यि॒म् । 43 (50)

TS 3.4.11.4

स॒जि॒त्वा॒न॒ꣳ स॒दा॒स॒हं॑ ॥

व॒र्षि॒ष्ठ॒-मू॒तये॑ भ॒र ॥

प्र॒ स॒सा॒हि॒षे॑ पु॒रु॒हू॒त॒ श॒त्रून्॑ ज्ये॒ष्ठ॒स्ते॒ शु॒ष्म॑ इ॒ह रा॒तिर॑स्तु ।

इ॒न्द्राऽऽ भ॒र द॒क्षि॒णे॒ना॒ व॒सू॒नि प॒तिः॑ सि॒न्धू॒ना॒म॒सि रे॒वती॑नां ॥

त्व॒ꣳ सु॒त॒स्य॑ पी॒तये॑ स॒द्यो वृ॒द्धो अ॒जा॒य॒थाः ।

इ॒न्द्र ज्यै॒ष्ठ्या॒य सु॒क्र॒तो ॥

भु॒व॒-स्त्व॒-मि॒न्द्र ब्र॒ह्म॒णा म॒हान्॑ भु॒वो वि॒श्वेषु॑ स॒वने॑षु य॒ज्ञि॒यः॑ ।

भु॒वो॒नृ॒ꣳश्च्यौ॒तो वि॒श्वस्मि॑न् भ॒रे ज्ये॒ष्ठश्च॑ म॒न्त्रो – [] 44

TS 3.4.11.4 - Padam

स॒जि॒त्वा॒न॒मि॒ति॑ स – जि॒त्वा॒न॒म् । स॒दा॒स॒ह॒मि॒ति॑ स॒दा – स॒हम्॑ ॥

व॒र्षि॒ष्ठम् । ऊ॒तये॑ ॥ भ॒र ॥ प्रे॒ति॑ । स॒सा॒हि॒षे॑ । पु॒रु॒हू॒ते॒ति॑ पु॒रु॒-हू॒त॒ ।

शत्रून् । ज्येष्ठः । ते । शुष्मः । इह । रातिः । अस्तु ॥ इन्द्र । एति ।
 भर । दक्षिणेन । वसूनि । पतिः । सिन्धूनाम् । असि । रेवतीनाम् ॥
 त्वम् । सुतस्य । पीतये । सद्यः । वृद्धः । अजायथाः । इन्द्र ।
 ज्यैष्ठ्याय । सुक्रतो इति सु-क्रतो ॥ भुवः । त्वम् । इन्द्र । ब्रह्मणा ।
 महान् । भुवः । विश्वेषु । सवनेषु । यज्ञियः ॥ भुवः । नृन् ।
 च्यौलः । विश्वस्मिन् । भरे । ज्येष्ठः । च । मन्त्रः । 44 (50)

TS 3.4.11.5

विश्वचर्षणे ॥

मित्रस्य चर्षणीधृतः श्रवो देवस्य सानसिं ।

सत्यं चित्रश्रवस्तमं ॥

मित्रो जनान् । यातयति प्रजानन् मित्रो दाधार पृथिवीमुत द्यां ।

मित्रः कृष्टीरनिमिषाऽभि चष्टे सत्याय हव्यं घृतवद्-विधेम ॥

प्र स मित्र मर्तो अस्तु प्रयस्वान् । यस्त आदित्य शिक्षति व्रतेन ।

न हन्यते न जीयते त्वोतो नैनमहो अश्नोत्यन्तितो न दूरात् ॥

य- [] 45

TS 3.4.11.5 - Padam

वि॒श्व॒च॒र्ष॒ण इति॑ वि॒श्व – च॒र्ष॒णे ॥ मि॒त्रस्य॑ । च॒र्ष॒णी॒धृत॑ इति॑
च॒र्ष॒णि – धृ॒तः । श्रवः॑ । दे॒वस्य॑ । सा॒न॒सि॒म् ॥ स॒त्यम् ।
चि॒त्रश्र॑वस्तममि॒ति चि॒त्रश्र॑वः – त॒मम् ॥ मि॒त्रः । ज॒नान् । या॒त॒य॒ति ।
प्र॒जा॒न॒नि॒ति प्र – जा॒नन् । मि॒त्रः । दा॒धार । पृ॒थि॒वी॒म् । उ॒त । द्या॒म् ॥
मि॒त्रः । कृ॒ष्टीः । अ॒नि॒मि॒षे॒त्य॒नि – मि॒षा । अ॒भी॒ति । च॒ष्टे । स॒त्याय॑ ।
ह॒व्यम् । घृ॒त॒व॒दि॒ति घृ॒त॒व॒त् । वि॒धेम ॥ प्रे॒ति । सः । मि॒त्र । म॒र्तः ।
अ॒स्तु । प्र॒य॒स्वा॒न् । यः । ते । आ॒दि॒त्य । शि॒क्ष॒ति । व्र॒ते॒न ॥ न ।
ह॒न्य॒ते । न । जी॒य॒ते । त्वो॒तः । न । ए॒नम् । अ॒हः । अ॒श्जो॒ति ।
अ॒न्ति॒तः । न । दू॒रा॒त् ॥ यत् । 45 (50)

TS 3.4.11.6

चि॒च्छि॒द्धि॒ ते वि॒शो यथा॑ प्र दे॒व व॒रु॒ण व्र॒तं ।
मि॒नी॒म॒सि॒ द्य॒वि॒द्य॒वि ॥
यत् किञ्चे॒दं व॒रु॒ण दै॒व्ये ज॒नेऽभि॒द्रो॒हं म॒नु॒ष्या॑श्च॒रा॒म॒सि ।
अ॒चि॒त्ती॒य॒त् तव॑ ध॒र्मा यु॒यो॒पि॒म॒मा न॒स्त॒स्मा॒दे॒न॒सो दे॒व री॒रि॒षः ॥

कि॒त॒वा॒सो॒ यद् रि॒रि॒पु॒र्न दी॒वि यद् वा घा स॒त्यमु॒तय॒न्न वि॒द्म ।

सर्वा॑ ता वि॒ष्य शि॒थिरे॒–()–व दे॒वा॒था ते स्या॒म

वरु॒ण प्रि॒यासः॑ ॥ 46

TS 3.4.11.6 - Padam

चि॒त् । हि । ते । वि॒शः । य॒था । प्रे॒ति । दे॒व । वरु॒ण । व्र॒तम् ॥

मि॒नी॒म॒सि । द्य॒वि॒द्य॒वीति॑ द्य॒वि – द्य॒वि ॥ यत् । कि॒म् । च । इ॒दम् ।

वरु॒ण । दै॒व्यै॑ । ज॒नै॑ । अ॒भि॒द्रो॒ह॒मि॒त्य॒भि – द्रो॒हम् । म॒नु॒ष्याः॑ ।

च॒रा॒म॒सि ॥ अ॒चि॒त्ती । यत् । तव॑ । ध॒र्मा॑ । यु॒यो॒पि॒म । मा । नः ।

तस्मा॑त् । ए॒न॒सः॑ । दे॒व । री॒रि॒षः॑ ॥ कि॒त॒वा॒सः॑ । यत् । रि॒रि॒पुः॑ । न ।

दी॒वि । यत् । वा । घ । स॒त्यम् । उ॒त । यत् । न । वि॒द्म ॥ सर्वा॑ ।

ता । वी॒ति । स्य॑ । शि॒थि॒रा () । इ॒व । दे॒व । अ॒थ । ते । स्या॒म ।

वरु॒ण । प्रि॒यासः॑ ॥ 46 (57)

(सो॒मो–गो॒षु मा– रयिं॑ –म॒न्त्रो–य–च्छि॑थि॒रा–स॒प्त च॑) (A11)

Prasna Korvai with starting Padams of 1 to 11 Anuvaakams :-

(वि वा ए॒तस्या॑ – वा॒यो – इ॒मे वै – चि॒त्त॒ञ्चा – ऽग्नि॑र्भू॒तानां॑ –
दे॒वा वा अ॑भ्या॒ताना॑ – नृ॒ता॒षाड् – रा॒ष्ट्रका॑माय – दे॒विका॑ –
वा॒स्तो॒ष्पते॑ – त्वम॑ग्ने बृ॒ह – दे॒का॒दश॑)

Korvai with starting Padams of 1, 11, 21 Series of Panchaatis :-

(वि वा ए॒तस्ये॑ – त्या॒ह – मृ॒त्युर्गन्ध॑र्वो – ऽव॑ रुन्धे मद्ध्य॒त –
स्त्वम॑ग्ने बृ॒हत् – षट्च॑त्वारि॒ंशत्)

First and Last Padam of Fourth Prasnam of Kandam 3 :-

(वि वा ए॒तस्य॑ – प्रि॒यासः॑)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे

तृतीयकाण्डे चतुर्थः प्रश्नः समाप्तः ॥

Details of Panchati and Padam for Kandam 3 , Prasanam 4 – (TS 3.4)

	Panchati	Padams
Anuvakam 1	4	221
Anuvakam 2	2	113
Anuvakam 3	8	392
Anuvakam 4	1	75
Anuvakam 5	1	67
Anuvakam 6	2	118
Anuvakam 7	3	146
Anuvakam 8	7	349
Anuvakam 9	7	359
Anuvakam 10	5	245
Anuvakam 11	6	307
Total →	46	2392

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in